



廣州府志

ル 5
1212
44



余光裕

廣州府志

卷一百一十二

何道臨

列傳十一

一

凡58
1212
44



廣州府志卷一百二十二

列傳十一 明 順德

潘光統 子豫之 憲龍 益之 孫

陳謨 子應龍

何道瀾 子用賓

黃民準 子應龍 祖璋

岑萬

何繼之

羅虞臣

鄺夢炎

馬鍾英

梁有譽 父世驃 弟有兆 有貞 子逢登

歐大任

鍾南

梁用遠 子符 孫兆電 孫朝鑑 曾

黃朝聘 弟朝賓

林挺春

陳其才 子琮詠 禹疇 孫迪 會孫慧業

嚴守約 族人應恩

韋憲文

余光裕

何道臨

廣州府志 卷一百二十二

列傳十一

吳譽民 孫元翰

陳克侯

梁夢雷

梁紹震

林志孟

薛藩

胡與京 子日乾

羅良信 弟良策

梁廷欽

吳繼禧 子冀

岑永清 次子之豹

羅應許

陳錫爵 父嗣光

黃儒炳 子圖贊

何功右

盧躍龍

趙恂如

黃士俊

洗憲祖

梁亭表

區龍正

李廷龍

梁有年

梁崇廷 父秀林

高賚明

梁元柱

歐必元

胡平運

梁暎

林逢春

鄭國相

余帝選

陳士諤

洗二

黎宏業

梁若衡

彭燿 陳嘉謨

陳邦彥

馬應芳

馬觀鵬

明

潘光統字少承順德沖鶴人少補邑弟子員輸粟為太學生以母老告歸從黃佐于粵洲究心子史兼攻詩學類選明音唐音若干卷佐為序以傳正德六年辛未選光祿良醞署監

事堂卿薦升大官丞歲羨萬餘中貴人侵沒為奸光統毫不染指羣邪斂手銓部廉其賢欲優遷之尋以病卒發其篋無餘積值其子豫之寄百金至乃得成殮時稱其廉光統天性孝友樂周鄰里之乏好圖史作怡馨堂飛雲閣以藏書著史漢存疑山房紀聞及詩文若干卷存于家子豫之益之皆敏雋能仗義有父風豫之亦官光祿署丞能詩著有櫟園集黎秘書曰櫟園詩大率樂府同美五言近體踵步王孟七言近體比肩錢韋五七言絕句類杜公腴遠則王昌齡李頎也子憲龍字孟驤郡庠生亦負奇氣老而不遇詩有祖父風可謂

三代詞藻矣

據五山志林修

陳謨字公贊號良齋父東山從增城湛若水隱居煙霞洞若水嘗稱東山年六十猶好學攜公贊來從受業講聖賢心性

之學脫然有悟遂卜築於烟霞後洞名其亭曰仰止設短床其中少假寐即起坐嘗惕然自訟曰謨遠離父母遠從學可悠悠虛度乎乃益自奮勉不就枕者七夕若水慮其厲志而病也力止之後隨京居逾年而歸見愈真養愈定凡所以事親敬長孚妻子信朋友處黨族者莫不求盡心焉其篤志如此嘉靖戊戌夏病革猶扶掖見母省訣還正寢而卒

據粵大志阮通

何道瀾字濬伯羊額人嘉靖元年壬午鄉薦壬戌授鄆城教諭以興德育才為己任巡按御史楊栢聞而重之會江西甲午主試缺奏以道瀾由分校主鄉試乙丑署長葛令築溟水石梁行道賴焉遷知安化寬和無擾百廢具舉撫按薦循良第一賜金獎異陞牧上思州時土酋黃宗美黃賢聚眾為亂

督府屬以兵事計擒兩酋事聞獎敘賜金幣積勞成疾引年歸會縣方改築石城知縣胡友信邀道瀾力勸大役五巡檢弓兵初設額冗為民害至是以承平詣部使者請汰其名數郡邑敦請鄉賓士論以為當卒年八十御史劉遠請祀鄉賢

據順德志修

黃民準字邦直別號慎齋甘竹人好學樂善少有文名屢試弗第應嘉靖元年壬午貢授福建政和縣訓導攝縣事值寇竄起修築雉堞以免於難九年滿補廣西平樂府訓導陞富川縣教諭嘉靖戊戌丁繼母憂遂不出年已七十餘師事湛若水講明心性之旨若水雅重之呼為老友年九十卒所著有心性解等書子應龍領嘉靖三十七年戊午鄉薦任武昌知縣績最陞戶部主事以清直敏斷稱據粵大記順德志修

岑萬字體一沙滘人少補郡庠生初名藪督學歐陽石岡改今名中嘉靖四年乙酉鄉試連登丙戌進士觀政工部授戶部主事管九江鈔關轉精膳員外郎主客郎中陞布政司參議督理御陶陞雲南副使嚴法御暴夷裔歸心陞四川參政轉廉使人棘闡得才稱盛陞河南右布政積羨數千皆歸公庫時稱清介陞福建左布政以持正忤直指萬壽節御史曾佩拜於上萬引卻之曰拜下禮也御史銜之謫廣西參政陞按察使靖江王不得於母作慈母不慈曲讌藩臬合伶人歌焉萬遽起曰此非臣等所忍聞也以子仇母於法為不孝一且上聞以此督責於王奈何王悚然謝之命焚其書子母歡好如初尋復河南右布政使前直指復肆詆誣以年老致仕時萬年方五十六歲浩然解組歸卒年七十三祀蜀名宦長

子用賓字允穆嘉靖二十八年己酉舉於鄉三十八年己未登進士推官衢州母喪服除補池州官南京戶科給事中崇經筵購典籍議從祀擇師儒舉遺逸皆其大者先後劾勳臣張溶李儒陳鏞朱希忠李庭汪道昆黃光昇錢邦彥雷禮呂光詢其劾福建督撫汪道昆曰道昆監督閩中為軍容辱遮留兩日夜所以得脫者臣不忍言之也今晉都御史督治之如以羊牧狼外見輕忽內生疑畏海寇吳平蹂躪我邊疆係累我人民虔劉我官校虜我卒五百斷趾遣歸恥辱孰甚道昆一策不施徒置酒烏石山平遠臺與客為長夜之飲所徵東陽戰士材官隊長悉從賞得羽書交馳孰能窺左足而先應哉闕茸淫貪不宜久握兵柄為國患道昆坐免英國公張溶豐城侯李儒遂安伯陳鏞皆罷去又嘗論高拱狼狽不聽

時道昆有文名而拱柄臣用賓敢犯之故直聲藉甚拱憾之出為紹興知府有故人致餽畏其廉託以茗進用賓面發之得金大怒絕焉高拱掌吏部考察言官謫用賓宜川縣丞卒於貶所時御史葉夢熊以直言謫丞邵陽經紀其喪為文哭之友人王世貞哀其遺文號小谷集梓焉初用賓嚴事南海會應珪嘗戒之曰材美易折玉美易缺予不能從子而翱翔子亦思免於難後用賓赴謫乃嘆曰昔慚柳下今愧應珪應珪內朗風節特峻沉冥混世蓋柳下之流云據阮通志修何繼之字克肖世家小圃順德志繼登甲科者六人祖璋成化十三年丁酉以南海籍鄉薦為橫州知州有惠政祀名宦後補沔陽州劉瑾索賄不遂逮詔獄州民千餘詣闕補留復任未幾乞休繼之登嘉靖四年乙酉鄉薦五年丙戌進士初

知攸縣豪民張金怙勢逋負執懲之由是知名丁艱服闋補
惠安委攝莆田士民稱服擢戶部主事歷郎中知松江府不
受糧長賄賂權豪帖然晉河南按察副使轉參政受委往小
灘與主事對糴雜糧解運京倉原額既完美銀八萬七千餘
兩同事欲私堅不從悉發府縣收貯晉福建按察使抵家卒

據黃通志修

羅虞臣字熙載初號梧溪又號華谷復號華原自稱原子大
良人年十九舉嘉靖四年乙酉鄉試八年己丑進士補建昌
推官建昌號繁劇難治虞臣素習爰書以文章潤飾之日召
書吏數人於前口占所謝故人書手授所為文若干使謄之
暇則讀書故虞臣居官文日益進而治日益有聲甫三載徵
刑部主事改吏部好剛疾惡與李開先任瀚等以文章氣節

相高而虞臣尤面斥人短以故多忌之者會大猾劉東山繫
獄上告張延齡有不軌謀憾虞臣笞已因訐及沈椿等帝震
怒命執先後提牢主事三十七人付詔獄榜掠獄具當輸贖
還職帝命杖之廷盡謫外任而斥虞臣為民既歸結廬山中
讀書纂述兩廣都御史蔡經薦於朝未用年僅三十五卒所
著有原子八卷

據粵大記明史劉世龍傳順德志修

謹案郭通志云明初自孫蕡以詩起南海學士多宗
之其文未嫺虞臣所為文上追兩漢下揖六朝環觀
天下方駕作者且近人淺學不務綜覽剽竊聲律遽
以詩鳴虞臣經史傳記靡不淹貫其於禮學援據古
今擬議尤確惜乎早卒所謂未見止也前後上其師
霍韜書最壯偉不減子長與任安書云

鄺夢炎郊之從子也字均房別號養吾先名夢吉字希因大

父鼎順德志云南海籍順德人成化元年乙酉鄉薦父岑宏治十七年甲

子鄉薦任湖廣應城知縣夢炎年十二善屬文十七入郡庠

撰五殊二實及黃鍾萬事根本論宏博淹貫多士稱服弱冠

領嘉靖七年戊子鄉薦累赴南宮歸則授徒講業都御史龐

尙鵬出其門時嶺南僉憲何元述龔大稔以知交過從言不

及私有清邑尹殘民命數十被逮以千金求解夢炎卻之庚

戌就浙之定海學諭月三試士皆捐俸供給樂舜等相繼登

第兩院交薦典福建文衡得許天琦等多名士癸丑丁內艱

諸士立碑思德乙卯服闋改補新建巡撫徐某薦之陞南京

國子監助教司成大加器重擢通判杭州癸亥大水申請減

徵賑貧百姓賴之以直忤鹽院解組歸室廬蕭然或諷之夢

炎正色曰子三世四科自先君雅志清苦子豈營營為子孫

作馬牛耶卒年八十六所著養吾吟稿藏於家據粵大記修

馬鍾英字君儲龍江人嘉靖十九年庚子舉人明年辛丑進

士令烏程邑多宦達據要津鍾英不為所撓判決有識聲績

茂著未考滿擢戶部主事監淮安糧鹽核算精嚴吏奸無所

售累遷本部郎中出知台州府瀕海多盜修戰艦嚴守望民

藉以安郡紳尙書應大猷薦之會以憂歸服闋再守南甯陞

雲南按察副使未一年乞病歸卒祀鄉賢據廣州鄉賢傳修

梁有譽字公實乾涿人進士題名碑作番禺籍未知所據據明鈔本舊題名錄則云廣州府學

父世驃正德八年癸酉鄉薦十五年庚辰進士監察御史轉

福建按察僉事有風裁有譽童時日誦數千言長益湛思百

氏工詩文弱冠補弟子員厭帖括與歐大任陳紹文吳旦黎

民表民衷陳冕梁孜黎民襄梁柱臣同學於黃佐以古詩文相劇切尤砥礪行誼登嘉靖二十二年癸卯鄉薦二十九年庚戌進士授刑部主事有陷虜奔歸為偵者所執廉得其情釋之先是李攀龍官刑曹與濮州李先芳臨清謝榛孝豐吳維岳輩倡詩社王世貞初釋褐先芳引入社遂與攀龍定交明年先芳出為外吏又二年宗臣與有譽入是為五子未幾徐中行吳國倫亦至改稱七子諸人多少年才高氣銳互相標榜視當世無人七才子之名播天下擯先芳維岳不與已而榛亦被擯攀龍遂為之魁其持論謂文自西京詩自天寶而下俱無足觀於明朝獨推李夢陽諸子和之非是則詆為宋學是時有譽在刑部蕭然一室不翁翁執嚴嵩柄國子世蕃欲親有譽遂以養母告歸築拙清樓杜門讀書大吏至辭

不見一日裹糧遊羅浮未至遇颶風得寒疾歸一夕卒年三十六有譽善相人謂宗臣曰子甚貴而無年已自嘆曰吾亦不久於世有譽死六年宗臣果死亦三十六所著有蘭汀集弟有兆有貞棉州守亦以詩名子逢登郡學諸生清標遂養為詩文有矩矱

據阮通志修

歐大任字楨伯號崙山陳村人少雋穎家多藏書博涉經史工古文辭詩賦年十四補弟子員督學林雲同張希舉嘗合十郡異等士三試皆列第一名噪諸生閒時與梁有譽黎民表梁紹震同學於黃佐八應舉弗錄由歲貢生試大廷瞿景淳得大任卷驚曰一代才也進御列第一由是海內知名隆慶四年庚午授江都訓導會纂修實錄捧檄至都事竣漕運中丞方濂薦轉光州學正遷邵武教授萬曆三年乙亥陞國

子監助教嘗應詔上封事一曰率講習以明實學二曰申法
制以廣生徒三曰修載籍以重掌故四曰崇實學以表賢才
歷下瑯琊諸詞壇見大任爭相推轂名益起與七才子並驅
才或過焉上幸太學大任以國學官序得左右侍上亦先聞
大任名御書不三二字賜之築寶翰樓藏於家獻臨雍頌賜
衣一襲尋改大理寺左評事黃太監姪殺人司寇以小火者
抵罪駁正之一日奉封事入奏其一許戚畹家人論絞事也
中貴自內出受封事卻之大呼曰御前封事誰敢阻卻竟上
同上者為吐舌嘗扈從南郊命賜果餅回國貢馬不受大任
為作天馬篇以頌歷官南京工部郎中庶務具舉督修孝陵
有白金文綺之賜十二年以老乞休年八十而終著有平陽
家乘二十卷百越先賢志四卷廣陵十先生傳一卷思元旅

燕浮淮游梁輶中離館西署詔歸秣陵南翥北轅籟園集共

六十卷虞部集七十卷行世據西樵游覽記與大記
明史黃佐傳順德志修

鍾南字汝異別號肖愚龍江人性誠篤事二親極孝弱冠為

南海庠生改三水試輒優等為文純粹尤精於經學授徒數

百人多顯者而南七入棘闈弗售嘉靖十四年乙未由三水

薦貢為福建福清縣學訓導端範立教捐俸以供會需得賢

如魏體明薛德純施觀民皆知名於時陞樂會學諭益勤誨

誘海濱誦誥有鄒魯風未幾引年歸嘗從鍾理夫得養性養

氣之訣年逾九十而精神完固士人多宗之據粵大
記修

梁用遠號徐廳上寮人嘉靖二十二年癸卯舉於鄉初授廣

西鬱林州學正理學為一時推重聘江西鄉闈同考陞袁州

府萍鄉縣邑與分宜接壤巖崑當軸田里多在萍鄉子弟恃

勢通賦前令莫敢問遠下車不避權貴嚴之族戚有抗逋者輒笞之不少貸嚴喉直指陷逋使者知逋剛正密令解組歸嚴家人要之於道袁州守潛以車蓋擁護始得免萍鄉向有虎患遠捐俸修理城郭安輯居民猛虎絕跡時人以比劉昆云子符中式嘉靖二十八年己酉鄉試考選為天下第一授福建福州府同知與海瑞同年最厚後隨總兵戚繼光征倭監軍轉餉賜金獎諭以親老乞致仕孫兆電萬曆十三年乙酉鄉薦授東安縣教諭時縣初建電至立學宮置學田卒於官會孫觀歲貢元孫朝鑑番禺籍仍舉崇正九年丙子科四世家學為邑望族

據金通志修

謹案阮通志云梁朝鑑以番禺籍中式見順德志不見番禺志而南海志選舉及明本題名錄則云由南

海學

黃朝聘陳村人狀貌魁偉性剛介不苟合與何維栢以文章節氣相高嘉靖二十九年庚戌進士官至雲南布政使痛革宿弊懲奸慝所至無敢干以私權貴重其名檄令劾所怨且厚賂朝聘正色曰明有君父幽有鬼神峻卻之權貴啣之幾至不免遂三疏乞休古今名節集其所著也弟朝賓由孝廉任福建長泰縣教諭入覲授長縣令病作不果就退歸與兄朝聘唱和著述鄉有海西詩社鴻才顯仕多推為盟主著有仙石洞稿

據張府志修

林挺春都粘人

南海志選舉亦見

字少和一字元育從湛元明遊事

親孝藩臬皆旌其門挺春日事親若曾子可也舉而律我當伏不孝之刑奈何以為嚆矢隨屏去之嘉靖三十一年癸卯

舉人教諭仙遊仙遊故有田租掌教多侵漁挺春悉散諸生嘗自作籩豆禮器遷知零陵調南靖南靖兵燹後官寺里屋一空蒿藿成林白骨滿野虎豹晝行挺春芟穢掩骼驅虎豹而遠之倚茅聽政已洪水至城郭蕩析乘桴露處乃遷於大帽山下邑焉漳經界不正自朱子已患其然今尤甚富者割倍賦之田無直以啗貧民貧民利而從之賦日積縣官受其病挺春悉問富者招流移撫凋瘵南靖大治遷霑益州知州以親老不赴挺春醇謹自筮仕至老未嘗一介取於人罷官益貧人以是重之據獻徵錄修

陳其才字少愷號復堂大良人幼為府學生力學不設枕簟三年室忽產異花人以為瑞其才不信也明年為嘉靖三十一年壬子舉於鄉隆慶二年就教山東昌邑所造士多成名

遷商河令復流亡者千餘家賦課最邑患蝗下令凡投一詞先納斗蝗贖錢亦以蝗代民爭捕蝗漸稀一夕大風雨盡殲焉他邑皆上災商獨有年太守巡行嘆為德政所感奸民路網以私憾中趙皋危法獄成矣其才疑之細鞫得其情竟與平反坐路法上官服其膽識他郡命獄示使聽焉德州李甲父老死以夙怨誣王乙其才爭之竟得白考滿轉知濱州治如商編審丁賦務使均平大吏皆知其賢其才念母值入覲乞終養當事慰留不得歸事母二十餘年里居慷慨好義創建邑南雙塔著有讀書法日錄官紀卒祀鄉賢二子長琮詠字叔鉉號華真積學淡名為諸生四薦不售不以介懷學使旌門賚冠帶次禹疇字叔敘萬曆二十五年丁酉舉人官甯州作倉於南昌水次便民輸輓瀕江有蛟陷田逃亡者眾

禹疇請捐租以寬民力民乃安集有物以瓦石擲民舍眾聚觀遂為奸禹疇援筆草禁章怪遽絕方聽訟孝廉某夜入以私干者就燭焚其牘旋致仕著有文選曠日講意琮詠子迪祥迪純同領萬曆四十六年戊午鄉薦迪祥號義雲署饒平教諭轉南國博遷北兵部司務迪純以特賜題名官刑部員外禹疇子迪儻以薦官中書迪祥子慧業字瑚仲一字岬雲生時父夢白衣人與以童子少有夙根崇禎六年癸酉鄉舉明年成進士謝絕遊讌講求理學奉使至雲間告假還里不以竿牘侵有司族有假其勢者語官執治之丙子秋復命行次吉安欲謁座主徐懋曙止金斗寺見僧眾集門若迎客詢之則以夜夢其師慧業歸令迎已云慧業聞恍然悟前生蓋本寺師轉世復同名也是夕無病卒子際臨父卒時五歲別

有傳據張府志順德志修

嚴守約大良人嘉靖三十四年乙卯舉人官甯海平和教諭遷國子監助教出守灤州治甚有聲會同僚有為巡按收治者疑守約為之中以蜚語改鎮甯軍吏與武人相緣為市主者隱之守約廉得其弊罪主者土酋安知安國亭交惡因之劫掠民患之當路以屬守約召二酋於庭諭以禍福皆謹奉約束卒官百姓哀之生平多大節伯叔賴以舉喪事兄嫂如父母終身不異爨以此見重閭里同族嚴應恩字若貺登萬曆七年己卯鄉科官東光教諭訓士不啻家塾陞國子監學錄出守象州亢旱力為賑恤發奸摘伏村獍不敢欺轉雲南霑益州安輯土地捐俸賑饑風俗漸變方超擢以雙親並老歸卒祀鄉賢據順德志修

韋憲文字純顯驚洲人少領嘉靖三十一年壬子鄉薦初工詞賦後乃研精理學教諭泰和以內艱歸補龍川擢國子助教著居敬正義訓諸生為有用之學旋遇外艱服闋補馬湖同知其地民苗雜居憲文興學勸耕練兵防阻以方直忤當事調黑鹽提舉擢靖府長史致仕後著學測一書闡明理學之要據順德志修

奈光裕字武可號江石馬岡人父尚卿有傳性孝友讀書經目成誦年十四補香山邑庠屢試輒冠諸生嘉靖三十四年乙卯鄉魁從湛若水遊默契體認天理之旨若水作三傑歌贈之屢困公車就懷甯教諭正己率物以養貞操擇士之秀者作文會因材造就士多丕變督學耿楚侗雅敬之聘典廣右交衡四十四年乙丑擢桃源令丁外艱起補博白復丁內

艱未任隆慶六年改令柳城下車革常例卻餽遺柳俗昏不親迎喪不輟樂又多火葬悉嚴禁之清隱占均差役贏子大蘇豪右屏跡獯民負險為亂中丞視師容柳間光裕擒巨奸數百撫降者以千計中丞上其功賜白金文綺萬歷二十三年遷蒙化府通判政尚寬簡蠲逋負數萬緡欲告休父老上書請留陞荆府左長史行李蕭然圖書數卷而已既抵荆藩上書言慎威儀戒嗜欲等八事王敬重之尋致仕歸年七十六卒順德志云卒於任並載荆王誅曰嗟爾左輔樸忠是導民望國華人龍天寶惜奪子鑑不遺一老顧此迅颺誰為勁生平行篤信操持清白弟光舍兩登乙榜有詩名子祖頤萬歷十三年乙酉舉人據阮通志修何道臨字建伯羊額人嘉靖三十四年乙卯舉人授高安教諭升崇善縣縣固荒徼改土為流俗雜交蠻親死焚毀同姓

為婚道臨悉令安葬復建墓亭十七所作詩三章刊示使民以時祭其焚毀者懲之立社學十八處勸誘秀民由是咸知禮教擢守涪州故事歲報羨餘以邀聲譽道臨請革之飾學宮禁器訟絕包收清盜源大綱悉舉會委勘永播同事者受賄求宥悉按以法忤當事左遷代府長史引病進階左參議致仕卒祀崇善名宦

據張府志修

吳譽民字紫樓黎村人嘉靖三十七年戊午舉人乙丑乙榜選許州學正主大梁書院八郡生儒多所成就遷邵武推官調度兵食防倭備極勤劬檄飭戰艦兵械皆得實用外艱服闋補鄖陽巡撫王懋貞聞其名令修鄖陽志并丈鄖襄屯田為分則壤九等厥賦維均經界清理軍民便之轉獨山知州身當六衛事務清操自矢土苗慕其德化凡苗種之最難馴

者皆刻木歸附當事令諭水西安國亭等譽民宣示國威皆泥首聽命以招苗甕袍功拜欽賞升思恩同知時用兵之際撫安八寨有善後功而卻交夷之金尤見操守會有譖之者遂罷歸譽民任滇時鄒九標適在戍與交遊砥礪風節其分校河南湖廣江西鄉試具稱得士孫元翰進士官關西僉事有長厚稱云

據張府志修

陳克侯字士鵠古朗人七歲日誦萬言嘉靖三十七年戊午舉於鄉署閩縣教諭擢令永福以廉介稱積胥為民害者以次摘發增拓邑城歲祿務賑恤境內賴之遷知永甯州補騰越州境多礦官藉染指久或藪盜克侯至即申嚴禁會地震下令救一人予三金活百餘人州徼去緬僅百餘里奸人岳鳳亡命教誘為邊患克侯以計擒之緬人擁象馬訶境上猝

無兵備羣擬閉門守克侯曰若閉城城外赤子皆殲矣因張
幟為疑兵開門納民緬不敢逼高國春木元端起徒步為萬
戶侯感克侯恩以千金壽正色卻之騰越兼治土苗例贄五
百金畏其廉不敢進遷大理郡丞仍管州事所部以行能薦
者三在事拜御賞者二無何以上官訐怨波累免歸尋復官
致仕家居二十年卒據郝通志修

梁夢雷號明霖倫教人嘉靖四十年辛酉舉人至萬曆癸酉
從弟夢昇亦舉於鄉夢雷歷官荊州通判政多奇績歲甲午
各省亢旱刑科給事中楊東明繪饑民圖進河南御史陳登
雲以饑民所食雁糞進時上齋居敕各省臣工禱雨荊州旱
魃尤甚夢雷出禱途遇一道士肆不避道夢雷問其能曰能
召風雨亟下車揖攜至東郊令人作壇數尺道士及夢雷登

壇須臾雷雨大作道士歸至中路私謂曰公德及人多矣當

令異人生爾家可速歸言畢不見夢雷入城士庶歡迎僉謂

惠愛感格所致特章薦將大用以老歸歸家百日而孫元柱

生夢雷遽卒據張府志修

梁紹震字原東桂林人隆慶元年丁卯鄉薦辛未乙榜署淮

安教諭當事聞紹震名萬曆丙子就聘同考山西己卯復就

江右所拔多名士升國學博士蕭良友良譽皆出其門及遷

牧河池佐郡平樂皆有政聲歸田作正學論以示子孫鄉人

咸稱泰臺夫子有緒昌堂稿平樂祀名宦邑祀鄉賢據順德志修

林志孟字淑之號韋銘古朗人幼穎異能文髫齡登萬曆七

年己卯賢書癸未乙榜授進賢教諭分校棘闈學士吳士元

侍郎李光元尚書熊明遇皆出其門時稱得人尋陞廣西荔

波疑是知縣築城修學風俗丕變士民繪象尸祝三臺交薦
調繁昭平殲積年巨寇內艱服闋補浙江建德令以卓異陞
戶部主事為忌者所中拂衣歸祀名宦家居四載卒著有疏
議及留餘集行世子孫能守其業邑令表其門曰世德成家

據金通志修

薛藩字侯宣龍江人少穎悟為古文立就萬言餽於學萬歷
四年丙子舉於鄉試十七年己丑成進士授行人先是日本
酋平秀吉自稱關白居對馬島使其渠帥行長清正等以舟
師數百艘逼朝鮮金山諸郡皆陷壬辰五月事也朝鮮世事
中朝承平久不習戰國王李昫又酒酒弛邊備島難猝起昫
令其次子瑋攝國事守王城而自奔平壤走義州事聞下兵
部議令駐險要待援號召通國勤王圖恢復時倭已入王京

劫王妃及瑋去八道幾盡沒乞師之使不絕廷議以朝鮮為
國籓籬事在必救而不欲遽興兵遂遣藩以行人持節給一
品服往使得便宜行事藩至諭昫以興復大義未抵倭軍而
倭且抵平壤朝鮮君臣急趨愛州明師既出前鋒敗中朝震
動趣經畧宋應昌進兵明年提督李如松戰於平壤大捷復
四道會倭乏食求封貢獻還王京返瑋而退朝鮮故土復定
藩在使多所經畫國人倚以為重復命賜賚甚厚擢兵部員
外郎丁內艱起補郎中值度支告匱藩盡心籌算國用裕如
賜璽書褒美出為南甯知府例滿以廉平居上考賜宴又丁
外艱服闋再補延平府改學舍設田贍貧生建漏澤園議置
產以充之士民為祠誌遺愛陞雲南按察副使雲南邊地多
故藩于洱海瀾滄諸地整飭得宜民用安堵甫六十即致仕

里居廿載儉約與平民等偶立門前更有持書幣至者以為

園公也遽呼令傳報至今傳為美談據明史順德志修

胡與京字子穀桂洲人萬曆十年壬午鄉舉授大埔教諭迎

母就養有甘露降於署人以為孝感課諸生敦實學著八行

解玉林摘粹諸書以訓之以卓異升國子學錄轉刑部主事

治獄多所平反轉餉遼陽殷勤將事歷戶部員外郎中居官

清介及卒橐祇圖書而已子日乾萬曆四十六年戊午舉人

澄海教諭薦南助教國變後不出遷界累民上書王巡撫請

復界語甚切卒父子同祀鄉賢據順德志修

羅良信字惇卓大良人萬曆十年壬午舉人授定州學正風

勵多士不事科條以身先教多所造就升衛輝理刑民性悍

黠狂狷紛紜良信以祥刑平反獄無冤滯轉彰德同知卻羨

餘發奸摘伏如神時中貴虐燄薰赫良信秉禮執義不靡不

亢中貴歛跡遷姚安太守俗少知書教民耕種給以牛種農

具尤重學校設科啟迪教以六經諸子之書士始知學性廉

介惟以俸緡自贍未嘗一介取諸民復守慶遠修城繕隍起

建社學葺治學宮凡可以成就安全鼓掖誘進無不力焉嗣

以勞卒於官弟良策戊子舉人博學洽聞官刑部主事所至

亦以廉能稱據張府志修

梁廷欽字體寅新良人萬曆十六年戊子副榜就教文昌調

補肥城教諭雅意作人升尤溪令廷欽問民疾苦嚴禁溺女

全活萬計清豁虛糧民免賠累之苦尋移平南愛民如子無

異尤溪古田羅運諸徭素難約束悉遣子受學平南治喪用

鼓樂痛飲費至破家槩為禁遏以朱文公家禮立教又捐俸

收瘞暴露枯骸尤平兩地俱尸祝之據張府志修

吳繼禧字少華赤花人萬曆十九年辛卯舉於鄉壬寅授龍游令龍游當孔道繁供億見供具嘆曰豈忍竭民膏以奉上縱薄而得罪將拚一官甦民足矣於是力為節減上官反重其廉介俗好訟繼禧聽斷明察民不敢欺暇即課諸生藝濬池通學墻地脉文運果大振建倉積貯備旱潦縣北澤有堰久淤積成水患捐募疏濬復腴田數百餘頃民號曰吳公堰一商死逆旅其妻誣居停繫久未決白其冤釋之有殺妻誣人者按驗無實一夕微行經其家猝訊其子具供父擊母狀出椎血痕猶在乃抵之法土豪殺人夤緣求免卒論如律政聲大著會考績衢州司理湯某忌之以下中註調陸川龍游民建生祠誌去思抵陸川值地震民徙為招流亡葺廬舍

始獲安集民多茅居一夕火大作繼禧泣號叩祝風止火滅民情大悅中丞楊某疏聞賜璽書褒異秩滿又有忌者轉判九江地通津關榷羨餘舊歸倖者悉還之關榷使上其績得旨加級尋以親老歸陸川請祀名宦又塑像別祠之卒祀鄉賢子六俱知名翼尤著崇禎間以責任潯州府推官據張府志順德

修志岑永清字克潤號天門沙潯人有至性喪親哀毀骨立躬荷畚鍤營葬兄弟同居無間言善治春秋授學西甯家焉由甯庠中萬曆十六年戊子副榜時縣始建令每事與商籍間田百畝予之不受所居濱江值淫潦驟漲廬舍漂沒永清募舟拯溺浮櫓殯焉卒後本籍甯邑並祀鄉賢次子之豹字子文少受庭訓領天啟四年甲子鄉薦乙丑成進士請外任便迎

養授江陰令奸猾藉豪庇以糧頭苦累貧戶之豹召豪至猝令自具田產實數籍記之清除投寄十之四五賦役遂均里胥舖戶歲派萬金曰公堂禮詳請革之撫按以能薦會鄉宦子毆殺在庠服兄諉罪於僕之豹窮治宦自京以書託不聽以事中去之之豹怡然就道歸隱羊城舊識來官者一見不再與兄之麟弟之鳳篤友愛產業共之著有麟經秘旨草堂

集據阮通志西甯縣志修

羅應許字蓋侯杏壇人出嗣伯父生母卒應許欲行三年之制禮與律俱無文惟會典有告假治喪之例乃疏食三年舉萬厯二十二年甲午鄉試授雲南理刑時土酋寇警應許捐俸糴粟以濟軍首不敢犯洗冤決疑民有神明之頌擢戶曹主事纂修賦役全書劄管草場芻粟會計適當擢北平糧儲

道兵燹後值河決倉無儲粟挽運維艱應許較量緩急建設倉廩五十餘楹遂免浥爛設水運糧船二百艘省腳羨餘銀十六萬奏入公怒不私毫末巡撫楊嗣昌聽讒親抵盧龍欲借運艘起釁縣尉張瑄力辨其誣楊不能陷復以驢運牛運之費孰省難之應許稱驢便嗣昌疑罵已欲劾焉迹之無疵始止後北平猶從驢運議其接濟登萊飛輓關楮皆應程期以薦擢山西僉事時旱魃為虐至日雨隨車下抵河祀禹廟秦寇擁萬騎臨河見應許一矢不發引去調臨沅兵備當四方雲擾之日鎮之以靜意氣安閒調度有方諸酋效順應許功居多終雲南按察副使據阮通志順德志修

陳錫爵字儒修龍山人高祖珺有傳父嗣光嘉靖三十一年壬子鄉薦為通道令清白卒於官按陳珺嗣光錫爵實順德龍山人康熙通志作南海

人明本題名錄作廣府人考南海志有錫爵傳而選舉無名錫爵時九歲母復見背號泣

辟踊若成人有慧質幼讀左氏史記能以己意置解弱冠

領萬曆二十五年丁酉亞魁授河南光州知州州苦河患錫

爵捐俸建潢橋以利涉轉滇南永昌府同知值土寇發府轄

三宣六慰八關二十四甸在在載鬼張狐乃首募鄉勇歷巡

關隘嚴斥堠詰偵探繕火攻寇聞風膽落雲龍土知州段進

忠負險不馴錫爵密陳方略縛進忠改其地為流撫按司道

三薦卓異兩登紀錄御史楊春茂請擢僉憲錫爵飄然掛冠

年未五十也所著有激觀閣等集據金通志修

黃儒炳字士明龍江人有夙慧十歲能文登萬曆三十一年

癸卯鄉薦明年甲辰進士改庶吉士授編修乙卯主試江西

辛酉主試應天升右中允進左諭德轉庶子管司經局事進

南祭酒清號舍敷倉厥修南雍續志輯二十一史轉南銓佐

部值尙書缺攝理堂務考核明允時魏璫竊柄冢卿缺會推

鄒元標不得俞旨儒炳兩疏懇用首言進用大臣必由祖制

以推用付銓臣票擬歸輔臣言極剴切攝工部主事惠承芳

議於都城下歲加稅十萬兩人情洶洶儒炳隨疏駁參議始

罷攝禮部篆齊庶宗多不法定宗長以弭亂萌奏廣監生科

額轉禮部右侍郎兼侍讀學士修神宗光宗實錄充副總裁

進吏部左侍郎兼官如故內傳欲以中璫出鎮儒炳陳其不

可至奉嚴旨詰責猶三拜疏右侍郎缺逆黨借內傳挾補儒

炳與冢宰王紹徽矢曰頭可斷缺不可假逆謀始寢既而黨

姪魏良卿得伯爵儒炳嘆曰事不可為矣即於是日以母老

身病告得旨回籍甫歸逾月而母病手奉湯藥親視含殮居

列傳十一

苦帷終夜悲號聞者悽愴哀毀成病竟卒年五十八番禺合
 陳鍾盛儒炳門下士也以入官田三百餘畝遺之力辭不受
 制府何士晉增權雜稅儒炳爭之乃止遼餉初興監司督責
 繁苛為請帶征民皆稱便澳門藉餉販糴為陳利害民獲安
 息甲子御史陳保泰激變被毆儒炳在南都欲與同鄉聯疏
 救解時首輔葉向高與保泰皆閩人莫敢僉者儒炳為疏辨
 晰後止誅亂首不株連無辜儒炳力也所著有影木軒文集
 詩藝讀書漫錄史槩諸書祀廣府番禺順德三祠鄉賢子圖
 贊字曰性弱冠補郡廩生以恩廕仕轉雲中有功陞戶部四
 川司郎中在任卒據金通志修

何功右字元理號念堂黃連人生三月而孤性好學幼習舉
 業弱冠益工奉母孝以母老絕意進取母疾朝夕奉藥餌比

執喪哀毀幾不欲生泣血三年傷母節未旌痛慕終身鄉里
 稱孝焉會歲旱賑恤不吝眾稱其義嘗夜歸遇盜於途以利
 害諭之盜感化為良善家蓄老牛忽向跪拜庭有靈芝甘露
 之瑞人謂行孝為善所致萬厯丁酉御史劉會聞於朝立坊

旌之據粵大記修

盧躍龍

張府志作北龍

字仲霖大良人倜儻有大節萬厯四十六年

戊午鄉薦初仕東安值邊警賊騎薄城時固安良鄉皆陷躍
 龍慷慨登陴率士民守衛襄城伯家僮玩命數而誅之民氣
 益奮合力堅守城獨存上功值母憂去已而城破民追思之
 服闋補上杭富人邱廷樞為勢要中以命獄繫久甫抵任集
 父老詣城隍神焚香誓聞者悚惕即按廷樞牘據理平反縣
 有數巨盜事發深匿臺使大索弗得檄責甚厲躍龍曰必如

兵法欲急反緩之乃可密白上司令族里以死聞陽為結狀

申上盡釋其親屬盜以為官已售欺也從容遽出掩捕盡獲

解之吏以背結得罪阻笑不應械至會城上官大加稱賞遷

淮安同知歸里杭民家為木主以祀甲申家居聞變哀泣成

疾進藥不許曰主辱臣死生也何為遂卒據順德志修

趙恂如字侯聖碧江人番禺籍少穎異善屬文潛心經術萬

曆四十六年戊午舉人明年成進士授中書舍人分校京闈

所得皆名士三奉使命歷閩楚吳越帝嘉其勞擢吏部主事

陞郎中有清通簡要之譽乞假歸杜門養疴尋遷四川按察

使具疏懇辭年七十卒畢生無疾言遠色厭浮夸喜布素有

古君子風崇正朝祀郡邑鄉賢據阮通志修

黃士俊甘竹人萬曆三十五年丁未殿試第一授修撰歷官

禮部尚書崇正九年入閣累加少傅予告歸父母俱在錦衣

侍養人以為榮唐王以原官召未赴後相永明王耄不能決

事數為臺省論列辭歸而卒據阮通志修

洗憲祖字懋章鷺洲人南少司空光其祖也生而穎異萬曆

三十八年庚戌進士授大理評事平反大獄存活甚眾轉比

部員外尋知武昌府政尚寬仁民歌其德會引疾去起補建

昌府鋤奸核逋境內肅然清官帑之歸中飽者五萬餘金蠲

小稅豁馬戶諸法之不便民者一切贖緩盡歸之公舉卓異

第一晉副憲備兵東湖繕備完整流寇戒弗近署臬篆阻建

逆祠轉參政守南昌道適寇薄都城慷慨入衛竣事因病乞

休卒年六十祀豫章名宦粵東鄉賢據順德志修

梁亭表字無畸號省莪碧江人萬曆三十四年丙午鄉薦授

黃州府志 卷一百三十一 列傳十一

潮州大埔教諭纂修邑志陞國子監助教遷都察院司務調吏部以賄求薦者拒之尙書某知其廉苦問曰何久無所舉耶徐對曰某實寡交轉兵部武庫司員外上英決言事者多得罪表章疏數上皆嘉納尋出爲南安知府府當兩廣之衝供應浩繁表一無所私流寇張獻忠陷湖廣南安西境爲賊所據塞其隘口賊不敢入境先是賊所至有迎者授以偽官時多以此逼協縣令飛檄日迫郡中官吏駭愕亭表慷慨睜目曰公等無怖君父重則身家輕不肖讀書明志三十年申胥哭庭魯連蹈海不待今日籌之審矣甲申北都陷聞之痛哭幾絕會直指薦泊行第一擢荆南兵備兼撫蠻副使聞報十日卒年六十有七著有臨池館課松謨山房藝古文詞昔莪集等書子若衡據金通志修

區龍正字象先西涪人萬曆三十五年丁酉鄉舉三十八年庚戌進士除漳浦尹有異政丁內艱去民祠祀之起補魏縣修漁陽書院大興學校土豪爲民患廉得實杖殺之名大著陞戶部主事晉郎中管通州漕務米包以布代蒲歲省十餘萬遼事起改理新餉釐剔夙弊稽正額外得羨十六萬悉以充公餉璽書褒美出巡西蜀適緬寇突攻太平各屬莫措龍正馳赴集兵破之斬首千餘級轉東川增修興文書院集諸生講藝緬寇復至時方署西道移鎮保甯提兵抵秦關殲寇而還幕府以邊材薦改廣西左江道時右江東蘭土州酋奴弒主作亂邊鄙爲動巡撫委以剿辦移鎮賓州宣布朝廷德意諭以禍福逆奴授首轉滇南屯道並署臨沅守巡二篆值阿述土司跋扈撫按素知龍正韜畧屬以討賊龍正先城維

摩州斷賊後路上機宜七事方議行而計報以年老令致仕弗克大展士林惜之著有司餉疏鈔四卷遼陽全書二卷輯刻洹山劉元城語錄二卷滄浪洞詩集六卷卒年八十有四

祀鄉賢忠孝祠

據雲南通志 順德志修

李廷龍字勳臣龍頭人少穎悟博極羣書萬歷四十年壬子鄉薦天啟二年壬戌進士出宰甯都地瘠民囂素稱難治甫及期年訟息時三殿兩宮並興土木誅求日急廷龍捐俸金清羨餘以應不科擾於民復值流寇逼近人心洶洶廷龍矢志死守陳方畧備芻糧身為士卒倡賊謀聞不敢犯加意作人倡明理學修黌序置學田以贍貧士甲子江西分考得士如雷穀趙光祚等皆一時名宿人服其藻鑑秩滿陞南吏部主事改北厯稽勲驗封考功轉文選司員外晉郎中每當考

核公慎自持無敢干以私者疏陳銓弊數十事皆切中時務上嘉納之辛未冬召對內殿眷注益隆有力定如山心清似水之褒以父老告養壬申予告歸卒年五十有六學道於魏浣初祀郡邑鄉賢著有毛詩翻疑綱鑑翻疑可亭集藏於家

據金通志修

梁有年字書之古朗人萬歷二十二年甲午貢入成均中順天鄉試四十七年己未進士選庶吉士丁內艱服闋授吏科給事中厯禮刑二科副修撰朱之蕃使朝鮮賜一品服卻餽金在諫垣多所規切抵觸貴近請釋纍臣風裁峻潔補山東參政備兵霸州州自劉六劉七殘破後餘孽未殄有年力復捕額備緩急歲旱蝗繼以霖雨民大饑借通倉官糧十餘萬濟之全活甚眾丞進羨緡有年以新學宮升河南按察使改

湖廣遷浙江右布政撫按薦推鄖陽巡撫命未下以外艱歸卒服官二十載負郭田不滿百畝祀霸州名宦據順德志修

梁崇廷字伯昂倫敦人父秀林能文韶州司訓崇廷與兄在廷同受庭訓少好舉中天啟元年辛酉鄉書又十年授政和令以清勤註最丙子遷南東城正指揮督修鳳陵役竣賜金褒獎戊辰以功擢北刑部主事歷員外郎中懷宗尙明察刑部治獄鮮稱旨崇廷不避權貴遇疑難事輒具牘爭嘗持節恤刑廣西讞千餘人平反詞悉明允癸未出守平樂撫字有方賀縣盜賊萬餘揭竿爲亂討平之乙酉靖江王亨嘉聞南都破欲自立徵糧兵爲變執巡撫瞿式耜幽之崇廷不爲屈有受藩署欲奪太守章者崇廷曰予官受自烈皇帝此印豈肯輕易假人耶堅守孤城終無如之何會亨嘉爲丁魁楚所

攻旋被執於陳邦傳亂定所屬州縣如故撫按上其功隆武朝加二品服遷按察副使分守左江道憂時勞瘁疾作請致仕得請歸以詩酒終餘年年八十二卒與父並祀名宦鄉賢

據家傳及順德志修

高賚明字孟良馬涪人天啟元年辛酉中鄉試明年壬戌成進士授新喻令以卓異著調安福留心民隱剛直不阿先是安福里戶解米泊省河守候兌收苦耗失賚明捐築城外行倉使暫貯待納民稱便福俗每獲竊盜擲濛潭斃之不送署訊陋習幾不可破賚明察出輒準擅殺律論於是宵小感化三年無犯竊者權監魏忠賢矯制毀天下書院變價爲已建生祠安福故有兩書院曰復古復禮已並在毀中賚明謂復古祀王文成湛文簡鄒文莊皆本朝大儒毀之則得罪名教

力爭之復禮緣是亦得免人士同聲頌之考滿擢陝西道御史旋以建言謫歸里賚明事親至孝生平淡薄自甘居家不置田宅惟購書史子孫皆列庠序

據順德志修

梁元柱字仲玉倫教人宋招討使起之後祖夢雷嘉靖辛酉舉人荊州通判父士芳元柱萬曆四十六年戊午舉於鄉天啟二年壬戌成進士授庶吉士選陝西道御史時魏奄竊柄同僚某欲介見魏瑞元柱嚴拒之書一聯於門曰患得患失鄙夫何足事君不怨不尤聖者方能遜世某見笑為不識時副都御史楊璉首疏魏瑞二十四大罪元柱繼疏為穹蒼之告變已彰聖主之去奸宜決事纍纍千萬言皆切時弊一時直聲振天下璉銜之削籍去歸隱省垣與朋舊飲酒賦詩醉則縱筆作畫山水松石鬼神人物無不精絕人爭寶之崇正

改元召還原職至河間而京師圍急朝官在外者咸多觀望元柱趨入京補福建道御史監北京鄉試巡省清壩旋奉敕按雲南便道歸省連遭父母喪服闋遷陝西參議未赴得疾卒年四十八

國朝雍正中祀鄉賢

據明史順德志修

歐必元字子建陳村人萬曆諸生嘗上書大中丞言救時急務時人韙之穆御史稱為嶺南端士梓其詩文名勾漏草年六十膺歲薦與修郡縣志晚年遨遊山水興之所至下筆千言立就所著瑤玉齋羅浮溪上二草康熙十九年奉取遺集

據張府志修

胡平運字明卿白藤人崇禎三年庚午鄉試舉第一辛未進士授庶吉士改陝西道御史正色立朝知無不言時濠鏡澳

稅居西夷漸積橫肆而閩寇劉香擾亂粵海當事選懦不敢

用兵粵紳官都門者積不平平運特疏糾參其畧曰臣竊惟

與海寇而已臣鄉人不言無為皇上言之者亦何從知萬里

之外受毒如此甚哉其一在澳夷住濠鏡澳凡番南東順新

皆可揚帆直抵其船高大如屋重駕番銃人莫敢近所到之

處確礮刃鐵子女玉帛公然搬運沿海鄉村被其擄奪殺掠

莫敢誰何至殺傷官兵上司亦莫敢問往者哨船不過數隻

今打造至於近百出入無忌挾制官司往者夷數不滿千人

今者報數萬一旦有警此數萬夷人何逞不得此大可憂也

而大蠹則在閩商其聚會於粵以澳為利者亦不下數萬人

凡私貨通夷勾引作歹皆此輩為之崇官兵盤獲其船則以

匿金匿寶誣捏反噬而中國邊情鈔傳邸報虛實亦在窺玩

中乞敕置臣禁制令夷將番船拆毀其通夷勾夷者嚴置重

典其一在洋寇粵自潮州而下及於陽電沿海俱是鹽場粵

東行鹽通粵西及江西吉安南贛三府與桂府土鹽年來閩

寇截據要路鹽船大小勒買路銀不從即焚其票賊來無時

乘風飄突越虎門一限可以直泊廣州城下去年二月粵將

陳昭李相斬賊以保全城朱可貞擒獲多舟以保陽電今賊

日夕圖報猝然再至何以為禦此大可憂也而大蠹則在接

濟米穀向禁出海自鄭芝龍至粵假兵食為興販又為潮船

運鹽之說帶私以入載米以出遂開接濟海寇之途乞敕置

臣嚴禁米穀出海以絕接濟其一在海賊南番東順新香等

縣交通小海皆百姓出入必經之路本地無賴聚眾打劫向

者不過數十人今以千餘百號白晝公行攻圍鄉村殺擄男

女良家被害者不知幾千百矣最可恨者擄人勒贖富者千

金貧者數兩刑威萬狀得其財復殺其命有產之家不敢出

門春農罷耕行旅絕跡官問哨調兵賊已先知消息此大

可憂也而大蠹則在窩家各縣窩賊必有主名乞敕置臣飭

屬緝辦如此則粵之億萬生靈皆受皇上再生之賜矣

疏入帝以未見報切責督按不

能消弭合回奏復諭以殫力翦除不得以積年夷盜卸責時

賊又劫江門新會附近村庄焚劫一空殺死千餘人火光三

日不絕遂至白藤鄉人招蛋民與戰賊水淺膠舟正在失勢

忽有閩人王繩武駕船旗上寫奉命招撫不許追擊鄉兵氣

阻賊遂脫平運疏糾其擁兵縱寇且言合為誰合繩武敢公

然脫賊白日欺人且江門巨鎮交易百萬不比村庄得財愈

熾禍不勝言乞飭置臣必以剿滅為期毋得招撫縱寇復得

嚴旨下制府卒出兵討平之粵寇乃息平運建言之力也巡

按雲南土司中惟化沙卧這二目最暴日相仇殺為邊害平運單騎諭以禍福二目羅拜聽命邊鄙遂安黔人立祠以祀黔遠在天末士不知學平運訓以蘇韓名篇士風日起復命會粵東有開採珠池之議平運力諫乃止轉福建參議歷廣西參政俱不赴卒祀鄉賢

據廣州鄉賢傳張志修

梁暉字宅義逢簡人中崇正六年癸酉鄉科授興甯教諭勤講課敦廉節邑人士翕然宗之時賊首陳丹陳周擁眾數萬脅興甯令開城出迎甯乏兵令懦莫措人心洶洶暉毅然環甲登陣身率士卒捍禦賊環攻連旬暉督守益力城賴保全既而民慮賊再至城內多潛徙者暉亟止之罄所蓄募兵購礮製火箭率子弟團練賊來輒敗殺傷甚眾功聞擢戶部司務受代人都賊銜暉久將要戕於路過歧嶺其婦請挈行李

先一日行而暉以次日微服出不意下舟暉曰是示弱也不聽遂遇害士民痛哭爭具殯殮賊嘗夢暉奮劍逐之神色沮喪丹先被獲誅周懼亦就撫偶至甯詣令城中人數萬不期而集爭局縣門寸斬之呼曰吾輩為梁公報讐死無恨矣當事義之釋不問

據順德志修

林逢春字孟育龍山人生而穎悟年十二有聲於庠崇正九年丙子鄉舉丁丑登第出漳浦黃道周門除會稽令地大而劇民奸吏猾號難理逢春能發摘人不敢欺九湖田患累民至即均其丁賦調劑驛遞使彼此相帮役勞頓節當掣鹽清出侵匿以餘羨申鹺院請移項積穀備荒尋改永定永定故在萬山中流寇數千逼擾城邑逢春集士民登陣守禦與戰擒其渠魁敘功擢佐常州以要政六條約民皆切時急癸未

廣州府志 卷一百二十二
晉戶部主事督餉浙江尋轉員外遷池州知府未赴病歸年七十三卒著有家乘識乘醫書詩韻蘭陵鄞江諸集子瑜貢生璟西甯教諭據順德志龍山志修

鄭國相字鳳陽林頭人仰庄長子宋鄭漢章十一代孫性至孝博極羣書屢試不售授徒清遠四十餘年邑士最著者鍾萬祿鍾自得父子科甲皆所造就二子昌烈昌緒孫啟中歲薦際泰康熙十四年乙卯丙辰聯捷進士入翰林人以為碩德之報據阮通志修

余帝選字伯禎馬岡人少遊泮孝事二人無間言丁內艱二月食粥葷年蔬食飲水服闋後不入內寢生平以德行自勵不入公門七戰棘闈未遇性好施與晚年隱居東山講學教訓生徒所著有四書秘義行世據阮通志修

陳士諤居家以孝友稱杜門隱居早謝舉子業而崇尚經學教子弟敦行孝讓毋陷浮薄賊至鄉莊擄掠率丁仗邀截脫回者百數十計人多其能家富於財輕貲以濟人急嘗救人於溺賑鄉里之饑者崇正四年鄉飲賓雍正元年入祀鄉賢據阮通志修

洗二與兄俱孤貧不能娶兄年五十替二取魚蜆為養丐得餽餘先以奉兄寒則分衣十餘年不衰兄死哭甚哀不能殯鄉人醵錢厝之據郝通志修

黎宏業初名宏基後避諱改字孟擴別號行俟馬潯人中天啟元年辛酉舉人崇正七年甲戌知和州八年流賊犯和州禦卻之十二月復至與鄉官馬如蛟募死士登陴固守城陷如蛟死之宏業繫印於肘跪告其母曰兒不肖貪微官以累母奈何母

李泣諭曰汝勿以我為意事至此有死而已遂自縊妻楊妾李及女四人繼之宏業北面慟哭再拜自刎未死濡頸血大書曰為臣盡忠為子盡孝何惜一死乃負劍上馬家丁挺擊賊斃於亂刃宏業復還沈眩氣絕印猶在臂賊亦嘆惜去贈太僕少卿任一子順治八年祀名宦

國朝賜諡忠節

據明史本傳勝朝殉節諸臣錄修

梁若衡字簡臣碧江人亭表子也性好潔事親孝由番禺籍舉崇正三年庚午鄉試十三年庚辰特賜進士授廣西永福令永福巖邑也獐獠居半時靖江王蓄異志陰與巖崗羣盜結每有擒獲強若衡開釋若衡悉置之法又奸徒指良民田獻王王遣使執券索印若衡不可王脅之卒不為動未幾流賊陷湖廣桂林大震若衡泣與母決誓必死俄陞左州守會

外艱訃至奔喪歸鼎革後故閣部陳子壯舉兵若衡應之事洩見殺

國朝賜諡節愍

據勝朝殉節諸臣錄順德志修

彭耀字著卿龍江人崇正九年丙子舉人十三年庚辰特賜進士任延川縣有能聲順治三年汀州遘變丁魁楚等擁立永明王由榔于肇慶耀任戶科給事中值大學士蘇觀生等擁立聿鏞永明王遣耀與主事陳嘉謨齋救往諭耀過家拜先廟託子與友人至廣州以諸王禮見備陳天演倫序及監國先後語甚切因歷詆觀生諸人觀生怒執殺之嘉謨亦不屈死耀贈大理寺卿諡忠愍

國朝賜耀嘉謨並諡節愍

據勝朝殉節諸臣錄及順德志修

陳邦彥字令斌

順德志作會斌巖野集作會份

龍山人少以文行負重名及

門士歲數百人先後數千人以其所居稱巖野先生爲人長身美髯高顴面微赤目光能與日敵性剛正果毅慷慨喜任事識見通敏穿穴古今爲諸生督學魏浣初旌其孝時陳子壯以秩宗抗疏歸見其文異之延至家使諸生受業焉邦彥亦重其人爲執弟子禮福王時崇正十七年五月聞國變卽走南京上政要三十二事格不用唐王聿鍵讀而偉之卽其家授監紀推官未任舉於鄉隆武元年乙酉以蘇觀生薦改職方主事監廣西狼兵援贛州至嶺聞汀州變已而贛陷觀生將旋廣州邦彥請其旨曰國未有主邦彥曰國亂先內國危先外今東喪八閩西絕洞庭北淪章貢獨兩粵存耳掃境內以屬閣下及其危而棄之謂天下何觀生曰然則奈何曰國自有主非所急閣下南歸以重兵間道疾走惠潮因漳泉未潰收

以控扼之猶可自立若必以擁立爲功謀議之間動淹時月士將恆怯難與守矣請留一軍以委邦彥當以死守之不聽南安人泣涕遮道留邦彥觀生亦不許遂以邦彥還廣州會丁魁楚等已立永明王由榔監國于肇慶觀生遣邦彥入賀王因贛州破懼逼已西走梧州邦彥甫入謁而觀生別立唐王聿錞於廣州邦彥不知也西至梧州方上啟候令旨夜被酒卧夜二鼓王遣中使十餘輩召入王舟中王太后垂簾坐王西向坐魁楚侍語以廣州事邦彥請急還肇慶命南雄勁卒取韶制粵東十郡之七而委其三於唐王代我受敵而乘其敝王大悅立擢兵科給事中奉敕還諭觀生抵廣州聞使臣彭耀被殺初由榔遣耀與陳嘉謨齋敕往諭唐王聿錞至廣州以諸王禮見備陳宗支倫序語甚切因詆觀生諸人觀

生怒殺之嘉謨亦以不屈死即日發兵攻肇慶以番禺陳際泰督師由榔遣兵部右侍郎林佳鼎率兵赴三水佳鼎故粵中監司與林察同姓相善察使羣盜詐降佳鼎信之乘勝追至三山口亂作全師皆覆佳鼎同僉事夏四敷赴水死肇慶大震乃遣從人授觀生赦而自以書陳利害觀生猶豫累日欲議和會聞永明王兵大敗不果觀生由是驕無和志高峽三水之間無日不戰勝負相當乃議水軍新敗無以爲守於是日由榔奔梧州邦彥遂變姓名入高明山中順治三年丙戌冬十二月大兵破廣州觀生死列城悉下邦彥乃謀起兵初贛州萬元吉遣族人萬年募兵於廣得余龍等千餘人未行而贛州失龍等無所歸聚甘竹灘爲盜他潰卒多附至二萬餘人總督朱治澗招降之旣而噪歸四年春大兵定廣州克肇慶梧州敗走治澗殺魁楚前驅抵平樂永明方自梧道平樂走桂林勢危甚邦彥乃說龍乘間圖廣州而已發高明兵由海道入珠江與龍會且遣張家玉書曰桂林累卵但得牽制毋西潯平間可完葺是我致力於此而收功於彼也家玉以爲然龍卒故無紀律大兵自桂林還救揚言取甘竹灘龍等顧其家輒退邦彥亦卻歸旣乃遣門人馬應芳會龍軍取順德約陳子壯於南海張家玉於東莞黃公輔于新會互爲犄角復聯絡嶺西一帶陸兵則新會王興陽春莫廷蘭新興梁位灼東安何仕璋等水兵則順德胡靖梁斌新會楊世熊李宗聖驍銳三十餘萬又約思恩侯陳邦傳鼓行東下大作聲援無何大兵至龍戰敗應芳被執赴水死四月龍再戰黃連江亦敗歿大兵攻家玉於新安邦彥乃棄高明收餘眾徇

下江門據之初廣州之圍大兵知謀出邦彥求其家獲妾何氏及二子和尹厚遇之爲書招邦彥邦彥判書尾曰妾辱之子殺之身爲忠臣義不顧妻子先是衛指揮楊可觀楊景燧爲內應而說花山盜三千人僞降得守東門乃與子壯會師九江約子壯從逕道攻廣州西南已從海道攻其東北且邀成棟歸路期七月七日薄城城中人三鼓皆發期約既定邦彥遂引軍而東子壯忽以五日先至薄城一鼓奪西郭砲臺火器颯發焚一角樓城中人固俟期而子壯家僮有乘馬張檄城下者爲養甲所得一鞫遂吐可觀景燧并被執謀洩將引退邦彥軍亦至謀伏兵禺珠洲側伺大兵還救會城而縱火以焚舟子壯如其計果焚舟數十大兵引而西邦彥尾之會日暮子壯不能辨旗幟疑皆敵舟也陣動大兵順風追擊

遂大潰子壯奔高明邦彥奔三水八月清遠指揮白常燦出城迎邦彥乃入清遠與諸生朱學熙嬰城固守邦彥自起兵日一食夜則坐而假寐與其下同勞苦故軍最强嘗分兵救諸營之敗者至是精銳盡喪外無援軍越數日城破常燦死邦彥率數十人巷戰肩受三刃不死走朱氏園見學熙縊拜哭之邦彥題詩於朱氏園亭壁曰無拳無勇無餉無兵聯絡山海矢佐中興天命不佑禍患是嬰千秋而下鑒此孤貞又曰戀闕孤懷盡懸絲一命微負傷如未覺無淚不須揮魚吮艱貞血水爲賄襪衣祇應魂氣在長繞玉階飛書畢赴池敵騎適入引出邦彥曰我陳兵科也旋被執檻車致之廣州養甲欲降之使醫視創饋之食不食繫獄五日端坐賦詩若無事者養甲知不可屈被戮臨命歌曰天造兮多艱臣也江之

許書生漫談兵時哉不我與我后兮何之我躬兮何苦厓山
多忠魂後先炤千古歌畢西向稽首受刃於時好事者爭投
紙筆求遺書時年四十有五所著有雪聲堂集十卷永明王
贈邦彥兵部尚書諡忠愍廕子恭尹錦衣指揮

國朝賜諡忠烈

據明史行狀成仁錄
勝朝殉節諸臣錄修

馬應芳

史作應芳巖
野集作應房

字子龍雒州人父義祥官雲南鶴慶府

知府仁廉有聲應芳弱冠補生員師事陳邦彥廣州破將死
學宮其友曰子無徒死甘竹諸鄉盜舟千餘不可一奮乎應
芳勃然起遂從邦彥往說余龍諸盜瀝血酒中指天相誓龍
等大喜率兵攻廣州邦彥則往九江招呼驍勇以為應龍等
既薄廣州斬首數百級遽退曰城堅無內應不可拔也至虎
頭門遇 大兵舟師數百以計焚之溺死者二千餘人轉攻

順德總兵李成棟猝至與戰龍大敗或勸應芳亡曰吾有母
遂就執沈之伏波橋下時年二十三邦彥之學為嶺南所宗
前後受業者凡數千人一訓之以忠義屬當變亂相從起兵
者自應芳而下有霍師連楊景熾二人皆摧鋒陷陣以死應
芳死最先次楊次霍邦彥皆哭而祭之曰吾為師乃不及吾
弟子為君而死實為師而死也自古死於君者多有之死於
師者三子之外曾幾何人吾不可以負之頃之邦彥亦死

野集

馬觀鵬字扶泰龍江人少英武奮身從戎崇正末李賊披猖
隨征有功授江西參將守贛州加陞副將進階龍虎將軍時
年二十四有勸暫假完婚者卒遇報急眾皆退縮觀鵬曰食
其祿者終其事隱忍偷生臣子大節安在遂進兵力竭而死

廣州府志卷一百二十三
國朝賜諡烈愍據順德志勝朝殉節諸臣錄修以上順德

南海李徵爵分纂 南海梁起初校 番禺金佑基再校
番禺史悠泰三校 順德羅槩四校

廣州府志卷一百二十三終

廣州府志卷一百二十三

列傳十二明東莞

何真弟迪子榮貴宏梁惠生

鄧國錡劉元杰黎光子受益孫結結孫閱

趙晦黃勛古子受益孫結結孫閱

陳璉黃裳

羅亨信子泰翟溥福

陳英弼張溥子蕤蕤子何潛淵子恪恂恂子綱

盧祥彭誼子恪恂恂子綱

陳用原袁衷祖友信衷子宜

鄭敬方俊

林光父彥愈子時衷族子

廣州府志卷一百二十三 列傳十二

陳猷 袁暉

周郁 父庠 子一士 一士子顯 昌齡子訥

李大震 弟大霖 大霖子如 陳朝資 陳沾澤 陳良泰

祁順 弟頤 政 從弟珍 子敏 孜 敕曾孫衍曾 陳韶 孫襄 襄子其大

何澣 王拯

范勉 袁仕鳳

鍾渤 葉永秀

劉存業 錢鐸

林韜 陳頊

余世盛 李希說 父璨

王纘 趙璧

陳恩 子越 超 赴 鍾紹

陳志敬 孫履 履孫文振 兄一清 李一甯 父德修 兄一清

何瀚 子應和 鍾雲瑞 兄雲祥 從子卿

譚清海 尹嵩

梁文重 鍾景星 蔡良

戴銑 子記 謝邦信

衛元確 陳建

王希文 林烈 子培 坦 城

劉日新 張鎔 子仲孝

何真字邦佐東莞圓頭山人少英偉好書劍元順帝至正初為河源縣務副使轉淡水場管勾棄官養母元末盜起真聚眾保鄉里十四年黃通志粵大縣人王成陳仲玉作亂真赴

告元帥府帥受賂反捕真真逃居坭岡舉兵攻成不克久之
惠州人王仲剛與叛將黃常據惠貪暴肆欲民不堪命眾慕
真義迎以守惠真擊走常殺仲剛併有循惠二州以功授惠
州府判尋遷惠陽路同知廣東都元帥守惠州二十三年癸
卯南海三山賊邵宗愚陷廣州守將何深死之大肆焚掠真
以兵破走之復其城擢廣東分省參政尋擢右丞進江西等
處行中書省左丞階資善大夫分省治廣弟迪以從政功擢
中奉大夫廣東道宣慰使都元帥兼僉樞密院事推恩二代
祖發藻父叔賢皆追封廬江郡公祖妣鄒母葉皆廬江郡夫
人未幾合江西福建爲一省改拜資德大夫江西福建行中
書省左丞仍治廣州至正二十四年正月明太祖始稱吳王
二十五年乙巳九月宗愚挾廉訪副使廣甯等叛圍廣真禦
之踰十月部將與賊通絕糧道真出避城陷贛州熊天瑞引
舟師數萬欲圖真真迎之胥江天大雷雨折天瑞舟檣擊走
之廣人賴以完先是真再攻成成卒固守二十六年丙午復
圍成真躬擐甲胄往擒仲玉以歸築砦自守乃使其弟迪騎
將黃從簡高彬等頓兵圍之募擒成者予鈔十千成奴縛成
以出真釋之引坐笑曰公奈何養虎遺患成掩面慙謝曰始
以爲貓孰知其虎奴求賞真如數予之鈔命具湯鑊趨烹奴
駕轉輪車使數人推之號於眾曰奴叛主者視此又使數人
鳴鉦督奴妻噓火奴一號則羣應之曰四境有奴叛主者視
此於是人服其賞罰有章緣海叛者皆降時中原大亂嶺表
隔絕有陳符瑞勸真效尉佗故事者逮而戮之以示無二心
屢遣使由海道貢方物於朝累進資德大夫行省左丞至正

二十七年丁未爲明太祖吳元年五月眞帥惠州部曲至廣
民響應復克之宗愚退走誘右丞鐵里迷失以歸明年制授
眞榮祿大夫自左丞遷右丞洪武元年戊申二月太祖命廖
永忠爲征南將軍帥舟師取廣東永忠至福州以書諭眞畧
曰元君失馭天下土崩豪傑之士乘時而起或假元之號令
或自擅其兵威暴征橫斂蠶食一方生民塗炭可謂極矣今
天子受天明命肇造區夏江漢旣已底定閩越又皆帖服中
原之地相繼以平惟兩廣僻在遐荒未沾聖化予受命南征
順者撫綏逆者誅殛恐足下未悟輒先遣一介之使相告惟
足下留意焉遂航海趨潮州三月師至眞遣都事劉克佐詣
軍門上印章籍所部郡縣戶口兵糧遣使奉表以降永忠聞
於朝賜詔褒眞畧曰自元綱解組羣雄並爭天下瓜分未見

定于一者朕舉兵濠梁創基金陵除殘去暴十有四年邇者
遣將四征所向克捷撫有七閩肅清齊魯廣西之師相繼奏
捷大將軍提兵北伐中原指日可定朕思昔豪傑之士保境
安民以待有德若竇融李勣擁兵據險角立於羣雄之間非
眞主不屈此漢唐名臣於今未見正此興歎爾眞連數郡之
眾乃不勞師旅先期來歸其視竇李奚讓焉今特驛召來見
錫爾名爵以旌有德於戲天厭紛紜人思平治爾之所舉實
惟知時堅乃初誠以懋乃績永忠四月抵東莞眞率官屬迎
勞永忠慰諭之仍以榜招降諸寨誅邵宗愚等餘孽悉平遂
奉詔乘傳入朝貢獻方物太祖賜文綺紗羅綾絹各百疋銀
千兩將校各賜有差侍膳內禁賜宴中書初賜詔諭援例當
繳眞叩頭乞賜藏於家爲後世子孫榮上可之授中奉大夫

擢江西等處行中書省參知政事且諭之曰天下分爭所謂豪傑有三易亂爲治者上也保民達變知所歸者次也負固偷安身死不悔斯其下矣卿輸誠納土不逆顏行可謂識時務者真頓首謝在官頗著聲望有德有威風行霆斷人莫敢犯而一主寬厚尤喜儒術讀書綴文三年召還已轉山東行省參政尋定官制改四川布政使四年命還廣東收集舊卒事竣仍蒞山東九年力請致仕十三年真請以其子貴參侍東宮卽除貴北城兵馬指揮後十四年大軍征雲南命真偕其子兵馬指揮貴往規畫軍餉置郵驛遷山西右布政使再與貴勾軍廣東擢貴鎮南衛指揮僉事十六年致仕復命真及貴還廣東收集土豪一萬六百二十三人還朝拜貴明威將軍鎮南衛指揮僉事真姪潤弼敬暨軍校數十人皆授官

十七年命真收集廣東軍士後十八年尋命真爲浙江布政使十九年朝京師改湖廣二十年復賜致仕八月封東莞伯祿一千五百石子世鐵券曰洪武二十年歲次丁卯八月戊申朔十一日戊午皇帝制曰昔人有云識時務者謂之俊傑曩者元運將終四海鼎沸擅聲教以役生民朝興暮泯相繼疊疊終不知時務而識天道尙驅民以應鋒鏑如此者豈一二人哉當是時爾何真率嶺南諸州壯士保境安民非其人安敢輕入爾守疆如此已有年矣其嶺南諸州之民莫不仰賴安全於亂時洪武初朕命將四征所在雖有降者非見旌旗則未肯附爾真聞八閩負固桂林之徒驅民海上逃生亦不量力獨真心悅誠服罄嶺南諸州具在表文入朝全境安民得非識時務者乎曩者事務繁冗有失撫順之道致真職

微有負初歸之誠今特命封爾東莞伯食祿一千五百石使爾祿及世世朕本疏愚皆遵前代哲王之典禮茲與爾誓若謀逆不宥其餘死罪免爾二死子免一死以報推誠之心其尚加恭慎以保祿位延於永久豈不偉歟爾敬之哉卒在洪武二十一年三月年七十廣州人物傳黃通志上親為文祭之曰維洪武二十一年歲次戊辰七月癸丑朔初八日庚辰皇帝命鳴讚奉御吳阿嫩諭祭於故東莞伯何真爾其俯伏諦聽朕有諭焉當元季海內兵爭羣雄割據不可勝數其識時務而知天命者幾何人哉爾真昔能輯眾保有嶺南當朕平定天下之秋不勞師旅即全土地以來歸使一方之民得遂安全可謂識時務者矣朕嘉爾誠心錫以官爵今以年高善終於家朕甚悼焉雖然身居高位祿及子孫丈夫至此又何憾哉爾其有知服茲諭祭赦葬畿南八里岡北遣官監護其喪子榮嗣東莞志榮字耀先二十一年四月襲封東莞伯與弟貴黃通志字奉及尚寶司丞宏黃通志字彥先洪武皆坐藍黨死案黃通志廣州人物傳粵

大記皆止言榮後以藍黨坐罪視爵郭通志亦止云榮襲封後二年罹黨禍人皆傷之時涼國公藍玉恃功暴橫以反誅榮嘗為其部將二十六年二月乙酉有司奏玉嘗遣親信召榮晨夜會私第收集士卒及諸家奴伏甲為變命羣臣訊狀榮坐誅東莞志云宏與貴皆坐藍黨誅後經肆赦後裔僅有存者真弟迪疑禍及已遂作亂擊殺南海官軍三百餘人遁入海島廣東都司發兵討擒之伏誅福王時贈真東莞侯諡恭靖據明史粵大記廣州人物傳黃通志修

謹案阮通志引黃通志粵大記俱云真為人豐偉美鬚髯吐音如鐘少時有相者謂曰公才兼文武霸王之器惜生南方微帶火色位不過封侯後果如其言既貴顯先墓常有紫氣人或指為符瑞輒斥絕之及

事高皇帝夙夜畏威惟謹高皇帝推心委任弗疑故能以功名終嘗於東莞率族人建祠置田以祀其祖復與弟迪謀悉以其先所遺田儲租入以祭其禰又以惠州城西之私第為義祠斥私田百餘頃為義田世俾宗子主祀事立塾以淑其子弟置庫以周郵窮乏嫁娶喪葬一如范文正公故事在朝名公多樂從之遊如宋濂方孝孺輩皆亟稱重之至論其保障南服識時知命又南越以來所未有也子八人知名者榮貴宏並詳錄之

梁惠生戩船澳人洪武初其兄惠養得重罪當解京就刑惠生留之曰兄承宗祀弟請代死遂從械繫至京師刑於市義士莫不傷之據阮通志修

鄧國綺勞德人性剛毅尙節概洪武初以賢良舉東莞志云授饒州府不就十四年辛酉草寇蘇友興嘯聚剽掠鄉邑騷動眾多降之國綺與缺口鎮巡檢李添鳳徑趨靖康諸鄉起集民丁二千餘屯守缺口鎮與賊戰不利退保深溪山賊復至益兵死戰力不支與李添鳳俱被執國綺罵賊不屈而死賊平後降民皆充卒伍惟戰死之家獲免侍郎陳璉表其墓曰義士後百餘年有劉元杰有膂力善射商於杭州值倭寇應募出戰斬獲甚眾指揮陷入重圍元杰單騎馳救援絕戰死杭人祠於北新關之鐘鼓樓據東莞志黃通志修黎光字仲輝鳳涌人博學能文倜儻有奇氣洪武五年壬子鄉薦與張唯王輝等十八人選入禁中文華堂讀書拜監察御史巡蘇州請賑水災存活甚眾巡鳳陽上封事悉切時弊

帝嘉之洪武九年擢刑部侍郎執法不阿為御史大夫陳甯所忌坐事中之死貶所因剛直被禍時人惜焉其父伯原元季連山教諭歷德慶惠陽教授所至學者尊之文風以振有

漁唱稿傳世

據黃通志
明史修

趙晦字俊明系出濮邸元季避地東莞之石岡在亂離中篤志問學手不釋卷時鄉里自雄者召為賓館不屑就洪武五年壬子以明經薦任番禺縣教諭藩憲諸公以其學純懿咸禮重之後陞國子監學錄一時門徒居侍從有聲者不可殫舉寓羊城東壩自號曰東橋學者稱東橋先生云

據黃通志修

黃勤字敏功柵口人博極羣書為文奔放出入經史元季避地邑之白濠擾攘中持志益堅無書披閱則假事文類聚與兄默手自鈔錄風寒暑雨不倦其勵志如此洪武初以薦授

邑庠訓導後改梧州二庠士子後多顯者侍郎陳璉嘗從授尚書世稱其善教致仕卒于家學者稱之曰學圃先生子受益字虛己世其文學善詞賦尤長于古文閉門授徒負笈者戶外常滿都御史盧祥副使鄭敬輩皆出其門雅志不仕永樂十八年庚子有司強之人試以春秋中選遂隱居不出年五十五卒有文集十二卷諸子皆業儒次子結最知名結字資友領正統六年辛酉鄉薦就天河教諭居僻陋益肆力于書史陞泉郡教授兩主鄉試樞要家以白金五百兩為其子關節且許保薦為御史結斥絕之泉人久廢學結嚴立科條士皆激發科第自是驟盛復擇生徒之穎敏者數人授以春秋後皆得雋泉中有春秋之學自結始也九載赴銓曹考為天下教官第一陞遼府右長史多所規諫王稍疎之久乃知

其賢後丁內艱起復轉岷府而卒所著有雲崑集結孫閱古

字時準東莞志選舉表作字博彥以進士官至福建轉運使據黃通志雲崑志八閩通

志

陳璉字廷器大橋頭人洪武二十三年庚午舉人卒業太學
試吏部高等授桂林府教授是時粵西方脫兵未遑庠序之
事璉至誘諸生講誦經史其歲大比解元出門下士獲售倍
他郡都督韓觀鎮廣西猛悍不下士獨折節璉見必稱先生
九載秩滿陞國子助教文皇入國擢知許州以寬厚安民郡
多淫祠璉毀之俗遂變尋改滁州滁當京邑要衝首驗丁賦
省徭役修學校勸農桑民用大和政暇時與僚屬賡咏醉翁
亭上百姓稱小歐陽上北巡過滁璉上巡狩頌廷臣上璉治
行滁人恐遷去詣闕乞留特陞揚州守掌滁州上征本雅失

里還上平虜頌安南平上平安南頌倣柳宗元上饒歌鼓吹
曲十二章上愛璉文學兩命同考禮闈外艱奪情起又九年
陞四川按察使四川去京遠民不畏法豪吏黠胥奸弊百出
璉至一治以法軍中有號虎彪太歲者人莫敢犯犯輒受奇
禍廉得其實密遣人捕之皆寘重典乃建言修武備慎刑罰
明禮制復義倉正風俗等九事上嘉納之宣宗即位召還為
南京通政使掌國子監事數年祭酒無特員專任璉正統元
年陞南京禮部左侍郎六年致仕璉德行淳懿文詞典重人
愛之若拱璧搢紳士大夫求碑銘序記詩賦者足相躡于門
應之如響故著作最多有琴軒集歸田稿尤好著書凡所臨
郡邑必採山川人事風俗物產以供賦稅之正而適上下之
宜者為書以傳若潁州永陽羅浮成都等志皆具存所至學

者考德問業無虛日黃蕭養作亂璉建制禦綏靖之策竟平之璉于書無所不讀嘗過關有書數車悉封鑰關吏曰宦橐邪璉不答令家人啟篋盡書也關吏隨手探書出困璉璉誦答無遺見書中多璉手記歎服謝罪家有萬卷堂多秘府所無之書四方之士來觀必館穀焉璉之去滁也滁人祀之于醉翁亭與歐陽修王禹偁為三賢祠東莞邑合吳中亦祠之邑中與李用春叟亦曰三賢祠郡學則列于仰高祠景泰五年璉卒年八十五據粵大記明史竊黃通志修

黃裳字文中東莞續志作文仲先世家閩之莆田從父景和成南海衛遂居于莞性莊重刻志學問通百家子史工詩文善書翰戎衛禮為社學師文武子弟從游者以百數蓋文學之儒也有司徵辟不就有敬庵集據黃通志修

羅亨信字用實英溪人永樂元年癸未舉于鄉二年甲申進士改庶吉士授工科給事中出視浙江水災奏蠲嘉興海鹽崇德三縣租五十餘萬石進吏科右給事中坐累謫交阯為吏居九年洪熙改元用太子洗馬張瑛薦召入為監察御史覈通州倉儲巡按畿內真定等府清軍山西皆有聲宣宗宣德中楮幣壅不行受勅治鈔法京師商賈漸見通用有薦其堪方面者命食按察僉事俸仍治鈔法待遷英宗即位之三月擢右僉都御史練兵平涼西甯時將官多私乘驛騎或貿遷擅起車牛奏禁止舊制官茶易番馬後許商運于甘州西甯償以淮浙鹽由是私茶盛行邊衛軍餘墾田不納賦至是令計畝輸邊帝悉嘉納正統二年蔣貴討阿台朶兒只伯亨信參其軍務至魚兒海貴等以芻餉不繼留十日引還亨信

讓之曰公等受國厚恩敢臨敵退縮邪死法孰與死敵貴不從亨信上章言貴逗遛狀請治其罪帝以其章示監督兵部尚書王驥等命往詢貴貴感愧伏罪明年進兵大破之亨信以參贊功進秩一等先是遭父喪奪情至是令歸葬往返有賜還朝改命巡撫宣府大同汰諸衛冗官老弱者四百八十餘人參將石亨請簡大同民三之一爲軍亨信奏止之正統十年乙丑進右副都御史巡撫如故時遣官度二鎮軍田一軍八十畝外悉徵稅五升亨信言文皇帝時詔邊軍盡力墾田毋徵稅陛下復申命之今奈何忽爲此舉塞上諸軍防邊勞苦無他生業惟事田作每歲自冬徂春迎送瓦刺使臣三月始得就田七月又復刈草八月以後修治關塞計一歲中曾無休暇況邊地磽瘠霜早收薄若更徵稅則民不復耕必

致竄逸計臣但務積粟不知人心不固雖有粟將誰與守帝納其言而止初亨信常奏言也先專候釁端以圖入寇宜預于直北要害增置城衛爲備不然恐貽大患兵部議寢不行及土木之變也先入寇人情洵懼有議棄宣府城者官吏軍民紛然爭出亨信仗劍坐城下令曰出城者斬又誓諸將爲朝廷死守人心始定也先挾上皇至城南傳命啟門亨信登城語曰奉命守城不敢擅啟也先逡巡引去赤城鵬鶚懷來永甯保安諸守將棄城遁並按其罪當是時車駕旣北寇騎曰薄城下關門左右皆戰場亨信與總兵楊洪以孤城當其衝外禦強寇內屏京師洪旣入衛又與朱謙共守勞績甚著著兜鍪處顛髮盡禿景帝卽位進左副都御史明年年七十有四矣乞致仕會報宦官喜甯偕賊詣城下議和密遣驍將

楊俊伏兵擒之賊患乃息上賜白金文綺初不許所請人京

陛見益力免冠叩首帝見其髮禿乃許之歸八年卒于家所

著有覺非集子泰能詩官承事郎

據明史本傳名臣琬琰錄黃通志修

翟溥福字本德柵口人永樂元年癸未舉于鄉二年甲申進

士除青陽知縣青陽地僻民稀因其土俗為政一以恩禮為

本民甚戴之九華山虎為患溥福檄山神虎即殄久之移新

淦地廣政繁能開誠布公遷刑部主事進本部員外郎為尙

書魏源所器正統元年七月詔舉廷臣堪郡守者源以溥福

應擢南康知府至則訪民情揅疾苦省刑罰禁橫征先是歲

歉民擅發富家粟及收取漂流官木者前守悉坐以盜當死

者百餘人溥福閱實杖而遣之地濱鄱陽湖舟遇風濤無所

泊為築石堤百餘丈往來者便之廬山白鹿書院經元兵火

廢溥福倡眾興復延師訓其子弟朔望躬詣講授考績赴部

以年老乞歸侍郎趙新嘗撫江西大聲曰翟君此邦第一賢

守也胡可聽其去懇請累日乃許之辭郡之日父老爭贖金

帛悉不受眾挽舟涕泣建祠湖堤祀之又配享白鹿書院之

三賢祠三賢者唐李渤宋周敦頤朱熹也

據明史本傳白鹿洞志東莞志修

陳英弼字廷佐永樂九年辛卯舉人十三年任廣西興業教

諭士罕知學英弼修建學校嚴立條約與諸生同食息連舉

者九人威儀文詞足為師範又同邑張溥字文博性嗜學詞

翰有晉唐風韻以通政使陳璉薦授江西袁州萍鄉縣學訓

導子蕤字子盛以詩經領正統三年戊午科首薦任彭縣教

諭蕤子昕字景明成化元年乙酉舉人福建教諭遷南京學

錄轉助教昕子鳴鸞字文和嘉靖十三年甲午舉人晉甯知

州據鬱林志黃通志東莞志修

何潛淵字時曜北街人質直明敏有操守富學問為詩文必以理勝立身務循規矩蚤從羊城陳仲璧講學旅館夜分有窺宋玉墻者斥使退朋儕重之仁宗洪熙初知縣李貞舉經明行修薦于藩司以親老辭歸親疾侍湯藥惟謹居喪毀瘠三年不近葷酒事兄潛琛郭通志東莞志作潛珍友愛彌篤斑白猶同財共居因名其堂曰同心晚年與邑耆英結詩社于鳳臺潛淵及羅泰社中宗之憲宗成化初嘗知縣吳中乞歸邑每舉鄉飲必躬請為正賓歲時式聞致恭稱為止齋先生年八十五卒同鄉長史黃結嘗曰維止齋行可媿古之君子才不愧今之名賢云據黃通志修

盧祥字仲和章村人幼多技能年三十始習舉子業往從其

兄全州訓導寬遊英宗正統三年戊午

東莞志廣西通志俱云宣德十年己卯科

較是領廣西鄉薦七年壬戌登進士高等擢南京禮科給事中多所論建丁外艱服闋補吏科論也先僭號之由劾大臣王文項文曜等風采大著未幾以言事謫山西蒲州判官慷慨就任以下僚自處或問之則曰吾固素位而行也天順改元召為禮科給事章疏剴切多見納二年陞南京太僕寺少卿以內艱歸八年補順天府丞其冬陞都察院右僉都御史巡撫延綏至則嚴武備肅綱紀邊境肅然屢以捷聞成化元年毛里寇邊祥與總兵房能擊走之賜璽書白金文綺二年春上言營堡兵少而延安慶陽各州縣邊民多驍果敢鬪若選以訓練必能用命且各護鄉里不煩調募請勅御史往會點編隸行伍號為土兵原僉點民壯亦改歸焉其優恤之法每

名量免戶租六石常存二丁貼其力役五石以下者存三丁
 三石以下者存四丁時得丁壯五千餘人此陝西士兵之始
 也議者欲進其秩為銓部所沮因以書抵其外甥祁順思求
 退休順答曰昔人謂使營菟裘吾將老焉論者有猶豫留時
 之謂舅何為而不早決也三年丁亥冬得謝歸明年五月卒
 年六十六遣官諭祭祥以氣節自高性寡合與同官林聰最
 厚凡所獻納必協力成之故其名稱亦相頡頏云祥嘗學春
 秋于安福吳節教其子士廉從子皞瞻調俊皆預賓興由是
 邑子之學春秋者益盛嘗修東莞邑志考訂精嚴人稱信史
 所著奏疏詩文號行素集藏于家

據獻徵錄黃通志吳川集修

彭誼字景宜黃通志宣德十年乙卯鄉舉市橋人正統中由鄉舉除工部
 司務嘗與尙書辦事無所阿景帝立用薦改御史正統十四

年己巳邊事起八月景帝監國有旨大臣舉風憲須老成人
 部以誼應陞湖廣道御史時王文掌院事號嚴明啟事不合
 輒瞋目不答獨禮重誼景泰元年庚午南直隸澇民有殍誼
 往賑之曰走數邑全活甚衆三年壬申河決張秋隄水東趨
 奉敕修理從尙書石璞塞沙灣決河進秩二等復決再往塞
 之先是尙書璞暨都御史王暹洪英各言方畧有欲以席裹
 石投之者有欲納石籠中繫絙以沈者試輒敗誼乃督役夫
 從旁濬之約先畢先息不限日既濬決水勢緩隨而塞之水
 復故處漕輓遂通五年從大學士王文巡視江淮擒獲蘇州
 賊擢大理寺丞明年二月擢右僉都御史提督紫荆倒馬諸
 關修築城堡造神臂弓守之尋復提督各邊關倉糧及保定
 等衛屯糧劾都指揮胡璽納賄縱軍罪天順初罷巡撫官中

朝有不悅誼者下遷紹興知府歲飢輒發廩賑貸吏白當俟朝命誼曰民方急安得循故事耶築白馬閣障海潮歷九載多惠政超擢山東左布政使入為工部左侍郎成化四年遼東巡撫張岐得罪吏部舉代者帝曰遼東自王翔後屢更巡撫多不稱可于大臣中求之乃改誼右副都御史往鎮守中官橫徵諸屬衛誼下令凡文牒不經巡撫審定者所司毋輒行虐燄為息十年冬戶部檄所司開黑山金場誼奏永樂中太監王彥等開是山督夫六千人三閱月止得金八兩請罷之遂止誼好古博學通律歷占象水利兵法之屬平居謙厚簡默臨事毅然有斷鎮遼八年軍令振肅年未老四疏告歸家居四十餘年卒廣州人物傳家居二十二年卒壽八十有八賜祭葬兩奉恩詔進階至資善大夫誼為人外柔內剛謙以接

物未嘗為皦皦之行而人爭愛重之官雖達居鄉惟乘一款

段或步行以自適云子恪廕補泰安州判恂字孟實景泰四

年癸酉舉人孫綱正德九年甲戌進士除浦城令巡按欲罷

機兵綱力持不可從征漳州寇有功及議招撫以綱往宣諭

賊皆降擢刑部主事黃通志郭通志云官至郎中賜清廉宴乞終養年四

十三卒據明史本傳墓誌廣州人物傳東莞志修

陳用原字志道性敏嗜學工詩文長于書翰邑宰王尙珮徵

為社學師後又禮為鄉飲賓舉止有儀年六十五終于家門

人梧州知府袁衷為撰墓誌張玳輩四十餘人為營墓石平

生所著詩文若干卷號西橋集據黃通志修

袁衷字秉中温塘人祖友信字雲蘿本名友仁以避諱改事

母孝洪武三十年以薦赴闕與閩人鄭萬年同被命往董七

閩經界事竣乞歸永樂十八年被徵卒于京師衷正統六年辛酉鄉貢初授戶部河南司主事歷梧州知府改平樂永州所至公正廉明民蒙其惠尤長于詩文所著有竹庭稿衷子宜字尚義成化元年乙酉舉人據黃通志東莞志修

鄭敬字德聚少秀異明敏每讀必百遍夜誦非三鼓不休正統六年辛酉舉人七年壬戌進士授南京湖南道御史廉介自持曹無滯牒六載陞江西按察僉事改河南雲南滿考將之京土酋循故習贖以兼金異貨家人或勸之受大怒叱之曰我司風紀二十年享有常祿猶懼弗稱况敢昧昧改節以欺天平竟卻之成化五年丙戌陞山東副使方逾四表而髮盡白即自陳致仕歸卒于家年五十八其卒也幾無以為殮人皆稱之據雲巖集修

方俊字彥卿河田人無書不讀最喜程朱語錄與名士新會蔣濬友善日夕唱和濬自以為不及景泰四年癸酉舉于鄉授浙江義烏令改廣西藤縣所至廉能有政聲俸入惟購書籍不事產業日吾留心田遺子孫足矣有虛堂集性峭直好面刺人過搢紳皆憚之雌黃人物少許可白沙陳獻章輩皆受規諫稱為三益獨重同年張泰後泰歷尚書為名臣人多稱其藻鑑據阮通志修

林光字緝熙別號南川茶山人父彥愈少服賈困于魚鹽久之若有得手書范文正畫薤粥長白山時事示其子已復購文正全集畀之曰是為汝師凡光所欲讀之書必購使得久之光舉于鄉不願即仕從陳獻章講學則愈喜手錄朱子語類至四十三卷呼光謂曰汝學能有立吾啜菽飲水死不恨

矣紆青紫耀閭巷何有于我哉光生而清臞資性粹美苦學不懈博綜經史年十七補邑庠生讀吳澄論學諸書大感悟建得趣亭日讀書持敬涵養其中成化元年乙酉領鄉薦五年己丑會試拜獻章于神樂觀語大合遂從之歸江門曰吾得師矣獻章亦深期之已而築室攬山往來問學者二十年巡撫朱某勸之仕報曰夫人幼而習之于小學必求所以事上長而進之于大學必求所以治下善學者不汲汲于施爲成敗利鈍之外而汲汲于吾心權衡尺度之間或學成而不用未有不成而苟用者也丁外艱服闋母強之出二十年甲辰會試中乙榜授平湖學諭以斯道爲己任以身爲教勉學者反身修行一時士習丕變上敦風化養廉恥疏言甚懇切巡撫彭某廉其賢待以賓師之禮二十二年丙午主考福建

多得名士贖禮皆却之宏治二年己酉主考湖廣是年總修浙藩憲廟實錄四年辛亥修嘉興縣志五年壬子復同考順天試凡三校文時服其藻鑒部使者以卓異薦陞兗州府學教授丁內艱起補嚴州府教授按察使孺需以古道正學作士淑人薦擢國子博士作正學解教胄子解諸生翕然宗之會孔廟被災上疏言孔子之心必不安于天子禮樂之祀題額宜曰先師孔子時論韙之三載考績奉敕褒嘉乞致仕不允陞襄府左長史先是羅一峯夢得詩一聯以贈云南冠今入習家池一代風流更屬誰至是符其讖云襄懷王新薨元化王暫理府事百弊叢積威令不行光隨方整頓由是宮闈肅清未幾進中順大夫致仕邑大夫請爲鄉賓皆不應日惟兀坐手卷與到則逍遙吟咏于世好澹然也年八十一卒嘗

言所謂聞道者在自得耳讀盡天下書說盡天下理無自得處終是閑也嘗以朱子大全多自悔之言謂其所以悔者乃其所以進暮年體驗蓋有人不及知而已獨覺者因取其警戒要會錄為一書名曰晦翁學驗少獻章十三歲所著有南川集嘗遊羅浮多題咏白沙弟子百餘人首推緝熙次甘泉云子時衷嘉靖七年戊子鄉薦仕至鎮南府知府有廉惠聲族子時嘉字子逢嘗從光遊獻章之門自律甚嚴入邑庠規行矩步不習流俗雖盛暑不去冠服無事則終日對書唔呶不輟提學魏校選為廣州西隅社學師初聘妻李未娶而瞽母欲改聘時嘉堅執不可竟娶之相敬終其身不衰時高其義獻章嘗作紫菊吟寄之時矩亦光族子白沙與書曰宇宙天地自信地吾自信吾自動自靜自闔自關自舒自卷感于此應于彼發乎邇見乎遠人爭一箇覺纔覺便我大而物小

物盡而我無盡又曰禪家語初看亦甚可喜然實是備侗與吾儒似同而異豪釐間便分霄壤此古人所以貴擇之精也起脚一差立到前面無歸宿無準的敬字子翼皆白沙弟子云或曰光族弟字秉之

謹案阮通志云時矩應卽時嘉諸昆也陳白沙與張廷實書云時矩語道而遺事秉常論事而不及道時矩如師也過秉常如商也不及東莞志明新會志及陳遇夫所編白沙弟子傳皆失載

陳猷字公遠少勵志聖賢之學博覽羣書充然有得領成化四年戊子鄉薦上春官不第卒業國學時邱濬總理教事較其文為首選以大魁期之徧交當世名士歸與白沙陳獻章論甚相得遂從講學隱居四十餘年澄心靜坐嘗于居旁闢土為壇號風日壇日與學者講論其上悠然自得甘貧樂道

晏如也當道多重其爲人參政蔣曙有檄旌云行止端莊學問優贍淡泊自如足跡不履乎城市節義是守賢聲久著于鄉閭非惟增重士林抑將表勵風俗晚得子瑾彌月而歿遂疾革年已八十七矣人謂天道有知云所作有金臺蘭陵吳興崆峒等稿藏于家

據粵大志修

袁暉字藏用茶山人十歲喪父時往墓下號泣家貧業香櫃以養母夜則讀書陳獻章過訪大稱許焉暉遂遊其門其學務力行不事章句新會令丁積見之歎曰不意布衣貧窶卓立如是獻章嘗曰林緝熙稱袁暉決非泛泛者伍光宇從余遊余甚愛之亦以其不泛泛也光宇死鄉曲未有如光宇者暉其光宇之傳歟後辭歸終身不求仕以孝友仁讓教鄉閭一時之俗爲變年七十二卒

據東莞志修

周郁字尙文號耿庵應禮記明經福建漳州府訓導培育漳士林啓數十人講學四先生祠寒暑不倦後啓等掇科第十有八九皆郁裁成焉歸里與陳獻章唱和有龍洲草集行世父庠子昌齡齡子訥俱有詩名訥子一士字昆彥博學雄才大司空董應舉爲郡博特薦粵東奇士第一兩中副車恬淡自守大中丞戴耀直指王以甯督學使者楊某前後式廬一見不可得所歷吳越晉楚間與袁石牛趙凡夫輩爲友平生有米南宮癖世稱石林先生書法漢晉楷草篆隸無不詣極有五老園稿楚游諸草行世卒年七十三一士子顯少穎異屢試冠軍風度淵靜敦孝友尙節義徵辟疊至隱居仙溪平生所著多不存稿同邑張家玉檢其餘者刻之並爲之序楷草行隸與父並美丐書者滿戶自庠至子顯于七葉中淵源

永遠焉據金通志修

謹案南海另有一周郁景泰丙子舉人

李大震字東伯阮涌人事母馮孺慕誠篤母病劇百藥無一效者乃割股調進病即瘳事聞行省旌其孝郡教授董應舉請賓飲者再弟大霖當母病篤時日夕禱于天請以身代尋卒當事並旌焉霖子如榴字美石萬厯三十年癸卯鄉薦第一博學能文行誼甚高事母能盡色養未仕卒至今稱有孝行者必首李氏一門據東莞志修

陳朝資字敏忠水南人居父喪執禮嚴苦朝夕苦塊未嘗御酒肉母病割股肉為糜療之與弟朝正友愛尤篤自少至老不異財郡縣屢旌其門以諸生終萬厯末有陳沾澤者茶山人亦割股療母疾見稱于時陳良泰字元衷赤嶺人幼而通

經學古知名庠序間母病革良泰苦謀之醫士不已或謂曰得人肉可瘥良泰即割股果愈督學聞而旌之一時目為陳

孝子據東莞志修

祁順字致和棠梨涌人景泰元年庚午鄉薦天順四年庚辰進士廷對當舉首以其姓名近御諱英宗名祁鎮于傳臚勿便抑置二甲第二授兵部主事巡山海關代歸轉戶部督餉臨清陞員外郎郎中充會試同考官憲宗成化十一年建儲賜一品服使朝鮮惟匹騎從自就館至旋旆凡輿馬金繒聲伎之奉一切却之三韓君臣相顧駭異為築却金亭刻使東藁未幾陞江西左參政三載以誥誤左遷貴州石阡府知府至則謹斥埃開屯田廣儲蓄流散日復土人素不知學自開郡來無貢舉乃集儒生親為講授數載擢科者數人宏治六年陞

山西右參政八年陞福建右布政使轉江西左布政使撫按交薦王恕在吏部亦疏引之內閣邱濬劉健皆欲薦順順辭甚力其生平邃學問持大禮宅心無私人亦不敢干以私用公帑一毫不妄費在江西積金數千將易簣聞人言可私爲歸計者卽戒妻子曰若私此金吾目必不瞑矣甯歸而餓死可也乃悉歸于公焉卒年六十四嘗著石阡志十卷詩文二十卷巽川集四十五卷冷菴翠渠倡和集各一卷寶安雜詠一卷使東藁十卷行于世弟頤字思正成化十五年甲午舉于鄉從弟珍敦雅明經子敏孜政敕皆以春秋家學得舉敕會孫衍會最知名敏字惟學宏治五年壬子鄉薦十五年壬戌進士授戶部廣西司主事宣慰懷來鎮給賜邊軍人受實惠歷陞員外郎郎中卒孜字惟勤宏治十七年甲子與弟敕

同鄉薦孜獨高尚讀書棠梨溪或勸其一上公車謝曰父兄爲國宣力足矣安用腐儒爲且一門俱紆青紫非所願也政字維舉正德十一年丙子鄉薦敕字惟允弱冠掄魁正德十二年丁丑進士歷刑部主事晉郎中嘗辯出曹恕王良弼之冤議減屈釗高欒之獄人以爲平嘗伏闕諫大禮廷杖戊子廣西主考竣事道拜饒州知府治獄如刑曹時奸吏屏跡嘗議鑿井濟囚渴忽泉自湧出人稱之曰應德泉會有詔造郊壇瓷磚敕疏陳民困乞罷役忤旨逮詔獄謫貴州婺川典史道病卒人咸惜之平居教子弟曰士君子求不愧此心而已進退榮辱命也人以爲至言名其齋曰新作箴以自警晚見王守仁與論窮神之化守仁語人曰祁子之所養深矣有棠埜藁傳于世衍會字羨仲性通脫不羈年二十三始折節讀

書欲縱觀四方名山水遊羅浮白稱羅浮山人入閩訪武夷
謁考亭自鵝湖之白鹿困于南昌從二童行乞于市作乞食
文臨川湯顯祖見而奇之萬曆四年丙子舉于鄉屢蹶春官
而好遊益甚善葉春及嘗于羅浮構遲葉菴以待之至西樵
又與霍尙守相善母喪痛哭發病卒有綠水園稿據阮通志修

陳訖字蒼岷

東莞志字仲和

温塘人景泰四年癸酉鄉薦天順七年

癸未會場火訖躍身棘牆以足屈伸救舉子七十餘人時稱
陳神仙成化間判瓊府值生黎反督臣以軍事委訖訖椎牛
饗士以血沙塗皮兩人共持一張黎箭不能入提八十觔鐵
簡擒其酋長蒲盧男黎冠平陞廣西僉事年七十三卒學士
邱濬以詩褒之有誰知別駕真丈人秋毫無犯除妖氛之句
孫襄字尙行一字贊虞九歲能文萬曆十九年辛卯與兄鼎

同領鄉薦為人質樸謙和不苟取與篤志好學游揚起元之

門甚器重之年四十四卒襄子其大順治八年辛卯副榜製

天象儀器訂正古今律呂推演三才為八十有一條編曰成

經據黃通志郝通志修

何澗字源清赤岡人天順二年己卯鄉薦成化八年壬辰進

士授松江府推官明允清慎門無私謁知府王衡贈詩有曰

關門共惜寒儒苦斷獄爭誇老吏明陞南京湖廣道御史轉

四川按察司僉事軫念民瘼巡歷僻阻卒于官時以薦擢福

建按察使未赴也澗平生好學務純實處事不苟非其義一

介無所取與所至以廉慎稱據戴通志黃通志修

謹案阮通志云陳遇夫所編白沙弟子傳別有一何

澗番禺沙灣人

王拯字以仁篁村人父挺拯由天順三年己卯鄉貢成化七年知邵武縣為人穎悟強記吏民有事于縣者一見即記姓名公廉愛民服食淡素嘗以公事出郊民烹雞供膳拯惟茹蔬食終不下筋其介率多類此督造版籍請託不行稽考精明宿弊盡革每朔望後一日輒詣學課試諸生賞勤懲惰率以為常尤慎興作時縣廳敝乃節稍俸積金三百餘兩以付耆民張舉生何澹曰儲此俟歲豐新之尋以憂去任拯歸以書白其事于郡守劉元召二人以銀至封識如故服闋補知杭之昌化政如閩時兩藩當道謂其心事可對神明離任六十餘年士民思慕如父母云據福建通志黃通志修

浙據

江通志修

袁仕鳳題名碑東莞志作士鳳字彥祥成化七年辛卯鄉薦十一年乙

未進士初授江西廣昌縣廉介風厲摘伏如神扶弱鋤強奸黨為之褫魄甯都人有侵漁者斂迹而去民歌之曰袁大宰真男子鋤擊豪強貧撫字吾今求取古人中惟有董宣能似此撫按薦知萬安縣民間風畏之及視事愛民如傷薄于自奉而厚以恤民其視廣昌政體微不同蓋寬猛之宜也期年吏部行取至京當得科道以無內援授都察院都事尋卒于官喪經萬安民爭祭賻之舟至不能容祀廣昌萬安二縣名宦東莞鄉賢據廣州人物傳東莞志修

鍾渤字元溥別號東岡橫坑人祖定安嘗分田給族人于鐵涌道旁建亭煮義漿以息行旅鄉里稱之渤少端穎年十二

學春秋成化十三年丁酉舉于鄉宏治六年癸丑登進士第授刑科給事中巡京倉劾太監侵漁不法狀奉命按山西盜失庫銀得庫吏柴光實蹟正其罪洗副使之寃時稱神明擢吏科右給事中備奏朝覲考察之弊勅勘遼陽兵變劾鎮巡大臣啟釁召侮及疏分兵固圉方畧上嘉納之調兵科左給事中疏歸省一年還朝查盤湖廣貴州事竣晉兵科都給事中為劉瑾橫構罰米百石已已出為浙江參議發廩賑飢民受其惠瑾誅陞雲南左參政以平蠻寇功蒙賞時渤已致仕家居足跡不履省城而建宮祠置祭田立卿館修學宮道路人以為難

據黃通志
粵大記修

葉永秀字汝實章村人成化十六年庚子鄉薦宏治三年庚戌進士知烏程縣清慎公勤力鋤強惡邑有水患連年飢歉

乃疏濬流港修築石橋民蒙其惠擢御史審滯獄正德元年巡按北直隸摧抑權橫論奏剴切執政惡其直出知永州府丁內艱家居劉瑾誣以事逮就廷尉得不死奪職歸五年庚午八月瑾誅起補知衛輝府未抵任陞陝西按察司兵備副使卒

據黃通志修

劉存業字可大城北人蚤孤事母孝未冠游于庠督學張習以天下士許之舉成化十九年癸卯鄉闈第二登宏治三年庚戌進士一甲第二人授翰林院編修時彗星見天津存業奉詔上時事多所嘉納武宗卽位充經筵官與修孝宗實錄有金帛之賜丙寅夏五月遇孝宗小祥恭祀于山陵歸而病作男謨方八歲在侍遺命以實錄未完母恩未報殊歉歎言訖而逝士論惜之從弟廩生存禮檢其橐中金索然幾無以

為喪其門人劉龍為主進里紳賻之護殯南歸時年四十有

七據袁莞沙集修

錢鐸字道鳴成化二十三年丁未進士除戶部主事監督通
州糧儲持平出納宿弊盡釐以廉公甚叶人望考最復留晉
本部郎中會戚畹奏求莊田行厚賂請為左右峻却之遂引

疾歸卒據張府志修

林韜字葆光學尾人家貧行傭自給文學鄭勝負時望授業
四方韜為治炊年甫十歲性聰穎聽誦讀輒能記憶聞所談
經洞解理要嘗于爨下操筆為文勝不知也宏治二年己酉
勝應鄉舉以韜從韜潛試儒士得入闈三試鎖院皆後至先
反不合勝知及榜發而韜有名勝落第且趣歸裝以實告勝
大奇之尋任上林教諭調吉水有毛某者嘗挈其子治縫紉

韜一見謂可造進因留以授業數年學大就及韜遷王府伴

讀去毛已成進士韜亦不知也解組二十年貧無以養令其
僕受賃官舫為舟夫會檄下遣溯保昌迎制置使久之迺至
所謂總制者毛某子也毛見韜僕猶識之亟命歸迺韜韜一
見而已織悉無所干毛益加敬禮年七十卒據張府志修

陳頊字子敬石涌巷人宏治二年己酉舉人授吳江訓導清
節自勵遷唐縣令時響馬賊分道寇掠山東河南所攻陷州
縣無算正德壬申二年趙風子邢老虎等攻圍唐縣頊盡夜
捍禦環城巡警二十八日得不破時復出奇斬獲以挫其銳
賊始引去都御史彭澤疏其功量移河南通判視事兩月而
歸據張府志修

余世盛字昌期宏治十一年戊午鄉薦以國子助教出為九

江推官時部使者張某權稅九江暴斂狼籍世盛發其賍私籍諸庫張夜遁去後中貴過之戒其下曰是常盤詰張員外者無輕犯也擢思明同知數以直忤上官卒于任九江人祠之稱其去害若仇保民君子云

據東莞志修

李希說字惟肖父璨成化元年己酉鄉薦任豐城教諭造土有方希說正德九年甲戌進士除永新令丁外艱起補直隸之霍山有盜猝起邑境希說僉選丁壯授兵登陴備禦甚密寇不能犯邑多朋戶詭寄按籍清釐一一得其主名覈實賦額載于版圖興學育才有父風擢南京戶部主事歷正郎以歸著有燕石稿

據東莞志修

王縝字文哲厚街人父恪寶慶知府縝登宏治六年癸丑進士選庶吉士授兵科給事中劾三邊總制王越附汪直李廣

不可復玷節鉞出理南畿屯田有司徵松江白紵六千疋縝言紵非正供且請停上清宮役詔皆罷之累遷工科都給事中武宗初立內府工匠以營造加恩縝率同官言陛下初登大寶工匠末技已有以微勞進者誠不可示後世宜散遣先朝諸畫士革工匠所授官帝不能用中官張永請改築通州新城縝言泰陵工作方興不當復興無益之役帝乃止正德元年出為山西右參政歷福建布政使遷右副都御史巡撫蘇松諸府協平江西賊王浩八乾清宮災疏請養宗室子宮中定根本去南京新增內官召還建言被黜諸臣不報已調鄖陽巡撫遷南京刑部右侍郎世宗即位陳正本十事嘉靖二年擢戶部尚書卒官

據明史本傳修

趙璧字國珍性敏好學篤孝友成化二十二年丙午鄉薦三

十年丁未乙榜署廣西融縣教諭化及徭民祀名宦宏治乙卯典試雲貴得人為最以外艱歸服闋登十二年己未進士與王守仁同榜以孔顏樂事相質證守仁重之請告歸養起授南京戶部主事有廉能聲每讀史至權璫誤國輒髮指適有運糧之役特上馭閣一疏朝野矚之既而留都修城推璧董役未竣丁內艱歸哀痛成疾卒正德六年劉瑾敗內廷得璧疏加陞工部都水司員外郎蓋特恩云據金通志修

謹案阮通志引東莞志云璧官止主事瑾敗內廷得疏實以工部員外郎召而璧已逝郭棐通志宋趙必璩傳稱璧官副使非是

陳恩字宏濟宏治二年己酉鄉薦初授福建南安學訓導待士嚴而有恩比去任橐無餘資秩滿銓選天下教職第一擢

大理寺司務歷陞戶部員外郎郎中選廣南府知府府治軍民雜處土不知書乃授以小學孝經親為句讀講解士始知趨于學後卒官無以為斂有土官為具棺殮乃得還子四人越字廷卓宏治乙卯鄉薦超字廷英宏治甲子鄉薦赴字廷獻正德庚午鄉薦建最知名別有傳據黃通志修

鍾紹福建志誤作鍾韶字大韶榴花人父琪字叔貴成化七年辛卯鄉薦梧州教授紹宏治十一年戊子鄉薦十五年壬戌進士十六年知崇安明信孚下與民約曰吾無下鄉之役符下汝等即當赴縣符有火字宜夤夜至民無爽者或問其故民曰入衙門不費錢而情得又何爽焉邑多盜紹下令諭其改行三月而盜不息乃嚴捕黠惡者斃于獄奸宄屏息外戶不閉每巡行塵市小民潔器獻茗止輿取吸問其疾苦若家人父

子然正德中改知長樂縣後陞刑部主事擢戶部主事遷員

外郎據東莞志福
建通志修

陳志敬字一之北柵人宏治十七年甲子領鄉薦嘉靖元年計偕值同邑舉子林載陽為漕運官兵擊死同行者各趣程去志敬獨留治其喪白之當事得免伏法一時稱其恤難之仁謁選授潯州府通判定催科規則公私便之署篆平南修城貴縣皆効勞績改南甯府判從平岑猛復有土酋盧蘇王受之亂檄守武緣二酋距縣三十里而陣眾懼欲奔志敬拔劍叱止之堅壁固守賊尋引去七年晉本府同知王守仁征八寨命提兵往斬首八十餘級守仁疏薦之十年都御史林富征忠江二州率眾擣巢渠魁就擒時多其功先是推官陝人藺宗遠旅覩不返者十餘年志敬捐俸倡義歸其喪癸巳

乞休給諫徐川常泰美其急流勇退黃佐稱其斷大事決大疑卹大難禦大敵成大役卓有定見定守云其孫履本名天澤字德基嘉靖三十七年戊午鄉薦登隆慶五年辛未進士初任蒲圻調休甯丁父憂起補崇德為政務長厚鎮躁以靜養威以寬不為苛察而政平訟理遷蘇州同知戶部郎中浙江大禮上疏言事擢廣西副使乞歸結社浮邱有懸榻集祀休甯名宦孫文振康熙五十二年鄉薦曾孫彥明康熙八年鄉薦據郭通志浙江通志
金通志東莞志修

李一甯字應坤篁村人宋春叟之後父德修嵩明州同知治寬簡有廉名一甯領正德二年丁卯鄉薦雞澤學教諭提學御史王應鵬檄掌漳州書院清苦不受贄諸生多所成就遷蘇州府學教授以身率人遇諸生常恂恂未嘗疾言遽色端

方嚴重不輕屈于上官郡守常稱曰此真教授也後知懷甯縣志在愛民不事矯飾冠服敝垢人疑其詐及卒于官囊無數金笥無新衣可殮士民哀慟之嘗渡江見覆舟中有動躍聲令人鑿之得一婦手抱嬰兒猶活詢為長沙人隨舅宦遊遇風一家淹沒板挂偶遺已二日矣遂捐俸買舟送還其鄉兄一清字應乾正德十四年己卯鄉舉知新繁縣有廉能名

據阮通志修

何瀚字源遠正德二年丁卯舉人任封邱教諭時流賊劉六齊彥名等擁眾剽掠所至殘破直抵封邱瀚部勒丁壯矢死殺賊自辰戰至酉大敗之盡奪所擄而還賊悉銳再攻復為所屺聞于朝以賄不入為內璫所阻而罷後因母老乞歸子應和嘉靖乙酉鄉舉梧州通判平馬剽賊有功

據張府志修

鍾雲瑞字天慶茶園人性溫粹潛心書史執親喪與伯兄雲祥廬墓鄉黨稱孝正德八年癸酉中鄉試第三人十二年丁丑成進士授南大理評事時寺正林希元以忤御史參降雲瑞疏言實與同事非則均非坐視希元之去恐涉賣友之疑乞一同降調不報士論高之考最調北寺副尋陞寺正會議大禮忤旨廷杖創甚幸不死起陞江西按察僉事執法理冤不避豪右未滿考陞布政司右參議謁南贛巡撫稍後以為慢已飛語中之改調歸入山居西廬為終焉之計後三年部檄催赴選補雲南左參議丁內艱服闋起補湖廣右參議提督太和山中貴橫恣繩以法陞副使備兵衡永不能隨俗媵阿上疏乞歸構一堂左圖右書閉門謝客與同里致仕知縣何楷知府林時衷等率行鄉約修明孝友睦婣任恤之行時

循寇連歲流劫糾衆防禦寇知有備引去鄉人德之爲建生祠于象山之陽逾年卒年八十有四祠成縣尹楊某題其額曰慕德祠自爲之記雲瑞嘗師湛若水而友林次厓觀其師友而其人品可知已別號黃山鄉人稱黃山先生隆慶庚午祀鄉賢仲兄雲祥字天兆邑庠生執父喪哀毀骨立及葬廬墓側朝夕哀慕餽粥僅充饑渴久之漸成羸病母強之歸抵家朝夕問母起居不入私室三年提學副使章拯旌其門雲祥歎曰子道之常自盡其心耳敢以要獎未幾病沒後提學副使魏校遣官立碑致祭伯兄雲錦子卿字懋敬幼倜儻有志畧年十七上書季父雲瑞勗以名節瑞大奇其志旣補邑諸生督學歐陽鐸以卿輔期之舉嘉靖七年戊子鄉試連登己丑進士知許州實心實政摘伏如神績最陞南兵部員外

郎進武選郎中丁外艱起補戶部河南司郎中坐祈穀南郊至後期謫郴州同知察獄賑饑民多全活遷萊州府通判郴人立石頌德入爲南都水郎中擢知九江府以郡當孔道供億浩繁弛其不急以甦民困修陂塘泉堰禁絕關權注籍之弊陞廣西副使踰年晉參政旋轉按察使時宗藩經据等觸法力請正罪諸宗肅然晉廣西右布政使三十八年己未晉福建左布政使上疏乞骸骨歸居鄉杜門不謁公府至其憂世之心未嘗釋于懷四十年倭夷山寇交訐誓衆固守賊不敢犯家居貧甚同官潘季馴巡按粵東郡有鹽池檄府給牒遣之卿方擁爐語諸子持牒我視之得卽投諸火諸子駭愕卿曰一境之利何可專之火之爲汝曹開生路也其守己之介老而彌篤如此隆慶初元以耆舊起懇疏謝病詔以光祿

寺卿致仕卒年七十七論者稱為百粵儀表一代球琳云據粵

大記郭通志
東莞志修

謹案鍾卿嘗為督府李遷署其堂曰清白事與順德

張拱辰同

譚清海字永明為人高視闊步好談天下大計嘉靖初以布衣上十事于朝當道阻之東莞志以上書言十事在上三大禮疏及與戚繼光行邊之後俟考

穆宗即位走京師復上三大禮疏一日復建文年號追諡二曰正景廟宜稱宗祔廟三曰議獻廟不宜升祔不報乃仗劍出塞時戚繼光為邊帥清海先閱其營戍人見曰四面置守兵勢易分何不一字守耶繼光拍案擊節次日偕之巡邊築隘滅戍皆用其策又嘗過柘林守將為之張燕酒方酣而部兵以索餉譁露刃庭下守將倉皇失措清海從容說以利害

令守將括俸分給不足傾遊橐佐之大學士張居正都御史

龐尙鵬尙書葉夢熊讀其奏議稱為當今第一將留之讀中

秘書清海曰吾能為真布衣不能為假仕宦固辭家近羅浮

每翱翔見日臺間自稱見日山人年八十四卒生平足跡幾

遍天下有詩文雜著十餘種據羅浮山志會編東莞志修

尹嵩字惟中性孝友篤愛庶弟正德二年丁卯舉人歷遊王

守仁魏校湛若水之門講求性學授餘杭令遷泉州同知轉

襄府長史甚為王所禮重三疏致仕嘗以祿不及養嗚咽流

涕見者為之感動據東莞志修

梁文重字仕任墩頭人正德十一年丙子舉人歷高安嘉興

訓導瓊州教授遷宜春令時部使者牒下責供漆文重力陳

民苦弗聽因中以法民相率訟冤不許乃代納金千兩得釋

補零陵縣值嚴嵩秉政其壻道過邑文重弗為禮後遷敘州
推官竟為嵩所排解組歸同邑尚書吳山故重所造士以員
外郎薦不就構東溪草堂講學其中學者稱東溪先生據東莞志

鍾景星字叔輝寶潭人少習舉業見就試者鮮禮遇遂厭棄
之潛心于內言笑不苟聞湛若水講心性學偕弟景暘往西
樵師焉從入京師數年與順德陳謨郭肇乾輩相策勵晝夜
正襟危坐獨觀昭曠之原浩然有自得之趣家貧不苟取雖
往來諸名公間終身未嘗干人人以此重之晚年養愈冲粹
喜怒不形望而知為有道之士家庭菽水盡歡父病所以身
代喪葬循禮蔬素二年既久哀慕彌切欲繪親容默禱之父
竟見夢于畫工一筆而肖嘗輯濂溪明道白沙甘泉四公論

學精言為宋明道學四書又註釋甘泉心性圖說一時學者
多傳習之年七十四卒無以為殮邑令喬誥助之乃克襄事
尚書何維柏銘其墓同邑有蔡良者學以涵養德性為本砥
礪名節為要出其門如鍾卿輩皆為端人學者稱南齋先生

據洛陽源流錄道學諸儒錄粵大記修

戴銑字子聲城西人幼岐嶷及長強記博學從陳鶴峯遊領
嘉靖元年壬午鄉薦八年己丑進士觀吏部政上裨治疏三
千餘言多關理道授禮部主事提督四夷館改四川道御史
慷慨言天下事一載間至十餘疏皆人所難言者劾刑部尚
書聶賢兵部尚書劉龍等六人不職吏部欲加銑輕忽重罪
上優容之後言官論尚書汪鋈黨庇奸邪當道切忌遂為所
排罷職歸名益重薦剝累及堅持不起從學于湛若水讀薛

侃論博約一篇淵然有得于是由博反約益究心體認之實年甫四十六歲而卒臨卒神思不亂曰修身俟命無慮可澄其見之卓如此隆慶改元褒崇遺直特贈奉議大夫光祿寺少卿著家集十卷子記字儀周博學能文登嘉靖三十七年戊午鄉薦四十四年乙丑進士歷雲南楚雄知府以循良著

據粵大記黃通志修

謝邦信字諭卿石涌巷人父祐重義好施晚年子貴而傲衣蔬食不改其昔邦信嘉靖五年丙戌進士除上高令遷南京評事謫柳州通判轉贛州稍遷建甯同知其在高名彊項令為廷評多所平反以剛直見忤于時遂至左官大肆其力于詞章詩專主杜甫論文兼綜遷因而運以己意蓋亦正嘉間之傑出者所撰有明詩類選石涌集謝氏篋中集據張府志修

衛元確字少乾城北整頭人嘉靖十一年壬辰進士授庶吉士閣試稱旨所進侍食慈甯慈慶二宮應制詩上嘉悅命加侍讀俸入侍東宮諸王以父艱歸服闋值世宗方崇祠祀改禮部主事遷本部員外晉郎中元確立朝公忠亮直砥礪節槩以不附嚴嵩謫通判旋召還命甫下而卒據張府志修陳建字廷肇號清瀾太守恩季子越超赴之弟也嘉靖七年戊子領鄉薦究心國家因革治亂之迹及道術邪正之分兩上春官皆乙榜以母老選侯官教諭博學強記諳于典故論文謂文有九善九弊因作濫竿錄以為式與巡按潼川白賁論李西涯樂府著擬古樂府通考與督學潘潢論朱陸同異作朱陸編年考督學江以達命校十三經註疏成代作奏稿又代海道汪某作海防長策奏疏七載遷臨江府學教授編

周子全書程子遺書大有造于來學聘典江右廣右雲南湖南試所得多名士尋陞山東陽信令註小學古訓以母老告歸養時年方八十四益銳志于著述乃哀輯洪武以來迄于正德為皇明通紀三十四卷著治安要議六卷其言切于變通救弊時朝議宋儒陸九淵從祀孔廟憂學脈日紊乃發憤著學蔀通辨以破陽明朱子晚年定論之編批禍根于橫浦證變派于江門中間詳著朱陸始終不同之迹閱七年書成復著古今至鑒六卷以嚴勸戒刻陳氏文獻錄以示子姪都御史莆田林潤修宗藩條例內翰李廷機編百子粹言多採建之說也建學識温醇議論純正至于崇正黜邪則毅然莫奪年七十有一卒又有經世宏詞明朝捷錄諸書當道名公咸採其策而收其用巡撫陳聯芳侍郎萬士和恭順侯吳繼

爵都御史李義壯均稱建學問博洽明體達用如司馬子長著述可以立百王不易之法可以開古今未決之疑程績洛稱通紀要議言經綸事業通辨言學術是非皆如布帛菽粟民生日用之不可缺也湖南內翰瞿九思造廬拜墓有謁墓詩文稱建著述多君國大許謨趨向端取舍正可以直號名筆云萬曆丁巳督學楊曜峽徐如珂採輿論舉祀鄉賢

賢錄洛閩源流錄粵大記修

王希文字景純圓沙人少儻負奇氣弱冠時藩司吳策以民事十二條規畫精詳多經世語由是知名嘉靖七年戊子鄉薦第一明年己丑成進士授刑科給事中時世宗明察英斷奏覆少稱旨獨于希文多採納稅璫所至暴斂而粵珠池市舶尤甚疏奏罷之又奏減蕪湖南贛梅關八省商稅所彈

劾不避權貴以忤輔臣夏言改南垣織造內監李政者怙威虐使工匠數以蹂躪死希文劾政伏法勛臣徐鵬舉包占官屯又劾削其地未幾歸家居三十年卒著有疏草詩文行世

據張府志修

林烈字孔承別號艾陵水北人父椿篤于行有長者風烈年方垂髻卽通左漢登嘉靖十三年甲午鄉薦嘗師事魏校潛心理學四赴南宮弗售就署江陰學教諭教人先孝弟崇德行士知講明正學二十八年己酉同考北畿解首出其門尋陞南大理司務九載遷員外郎中皆以勤慎著聲三十九年庚申督賦江右綜核惟嚴辛酉父卒甲子起補戶部郎中乙丑同知福建鹽運司事革常例祛宿蠹毀淫祠立社學關射圃與諸生講習其中又廣養濟恤孤貧驅虎患修火政百度

具舉未幾夢歸章綬適奉世宗遺詔至病不起百姓悲號立祠水口尸祝之烈初學于魏校崇尚實行私淑于林光作聖學格物之訓以聖人必可學而至終曰乾乾養日深氣日粹蓋充然自得也諸所交遊廬陵則鄒守益羅洪先安陸則何亞卿吾粵則鍾景星龐嵩何維柏皆以道鳴海內者視其師友而烈之學可知已福建祀名宦祠廣東祀鄉賢祠著有青山紀聞一卷卧雲洞詩文三卷子六人培坦城俱領鄉薦培字培之剛毅慷慨孝友尤篤萬曆九年癸酉鄉舉二十年爲湖廣新化知縣縣僻陋廣置社學教之歲饑賑卹又修水利建義倉一百五十四所民有死于盜者盜不得禱于神隨蝴蝶所至獲盜時驚爲神徵授南京御史劾罪誠意伯劉世延寘其爪牙于法已上書言事其疏畧曰陛下不崇朝而斥逐

臺省三十四人閣臣再救而邊方之旨下九卿再救而削籍之旨下意者陛下意有所欲為恐諸大臣言官之防已先示以必不可犯之威乎夏之臣等以搜贓謫徐維濂以追比謫人將謂陛下貴貨而賤賢沈思孝江東之李植剛狠傾危庇丁此呂之奸貪與孫丕陽相訐願宸衷獨斷無兩賢而兩全之陝西織花絨購回青百姓疲困不支湖廣以魚鮓江南以織造并奪撫按俸蘇州通判至以織造褫官一服食之故而令簡書之臣不安其職郡縣之吏莫必其命民窮財盡天下自此多事矣臣言行身死死有餘榮不行而生生有餘愧帝怒謫福建鹽運知事兩臺不欲煩以簿書檄搜名賢遺跡所至皆新其祠墓足跡幾遍八閩尋念母老請告歸家居一載卒京師人語曰南林北馬臺省增價馬通州人名經綸時以

直諫同時得罪云天啟初贈光祿少卿祀新化名宦有疏草

治錄遊記詩稿行世培孫游另傳坦字坦之萬曆二十五年

丁酉舉人生平高自位置不問家人生產羹藜茹藿甘之如

飴每酒酣引筆灑灑數千言立就人或相稱譽顧謂是吾緒

餘耳負才傲睨外間率目為狂生袁崇友獨稱之城改名垂

字垂之與坦同科鄉薦

據郭通志明
史東莞志修

劉日新字宗毅孝友性成四歲即知禮讓父蚤喪事母至孝

母年八十病篤顚天者七晝夜母聞空中若有奏金石聲病

尋愈後卒廬墓三年御史蔡夢說嘉之左轄饋粟米布帛歲

以為常自是中丞監司至者必旌焉年九十二卒

據東莞志修

張鏘字時侃博綜羣籍隱里中談道自樂家居動遵矩矱事

親孝待兄弟友而恭接子姪嚴有過則庭撲之朋舊過從命

觴浩歌以淵明自况構山亭扁曰恒齋自記有曰恒吾性也貧賤富貴一于此而已矣學者稱恒齋先生子仲孝本名仲湯字彝先一字敬所嘉靖十六年丁酉鄉薦庚戌授平陽知縣恤窮民鋤豪猾政惠而肅學宮為颶風所壞力改創之以才望調思明單車馳赴詰戎修備徐按部各土司宣布朝廷威德皆弭耳受命卒于官所著筆籌集語行于世據阮通志以上

南海李徵爵分纂 南海梁 起初校 番禺金佑基再校 番禺史悠泰三校 順德羅 槩四校

廣州府志卷一百二十四

列傳十三 明 東莞

王所

黃尙正

周望

黃誥

羅一道

翟守謙 子繩祖

袁昌祚

鍾繼英

周繩武

尹瑾

顧輝

鍾昌

梁煌哲

陳絢 張鵬 袁以芳

陳履

袁應文 子崇友

袁敬 子登道

黃應明

謝貺

尹守衡 弟守禮 守禮子魁 昌 兆昌 玉如

尹遂祁 子體震

劉鴻漸 父應寅

陳國是

徐兆魁 父應寅

彭際遇

陳鼎

鄧雲霄

翟廷策

祁文友

盧瑛田

姚鈿

陳秉良 子應乾

樊王家 弟王甯

温可正

趙響

王猷

張恂 子景福

張二果

郭九鼎

袁崇煥

陳策 子兆蘭 兆熊

蕭奕輔 父道

尹明翼

陳象明 子應光 孫阿平 誥錫尙文

王應華

張家玉

蘇觀生

林洵 弟泗美

李如月

安宏猷

張家珍

明

王所字敬作東莞人 邑志字宜敬 祖尙學字宗儒宏治二年己酉

鄉薦官柳州同知父玉汝字體成嘉靖元年壬午舉人十一年壬辰進士官主事所嘉靖十九年庚子鄉貢任古田令嘉靖末倭寇流毒古田城垣卑薄不足為備所諮于父老曰太平之盜志在金帛與攻城掠地者不同城郭溝池所以為富者守也于是籍富人為三等計役分任之增城堞建樓櫓鑿溝濠以防不虞未幾倭薄城下所親操矢石率眾防禦夜遣

驍勇縱焚其營倭遁去後備兵使者蜀人宋豫卿作詩咏其事有社稷有靈憑一旅山河無恙仗孤忠之句

據福建通志東莞志修

黃尙正任江西龍泉縣秀州巡檢嘉靖四十年流賊數千掠縣率兵迎戰以兵不繼與僕被執紿賊釋僕歸取貨贖潛與縣書約以兵千人急攻從中應之可盡破也縣兵不至死于難事聞贈太僕寺丞廕其子承忠入監龍泉民祀焉

據郭通志修

周望字道見章村人嘉靖二十二年癸卯進士除工部都水主事督造運艘淮上倭寇縱火焚艘望率兵禦之斬首二十四級艘得無恙督師趙文華抑不錄丁憂起補虞衡司歷員外轉都水郎中視河張秋出知嚴州府力節省以給船舶剔蠹慎獄擒鑛賊境內晏然修濬東湖用資輸灌民懷其惠配祀前守張子宏張任有號三賢祠擢陝西行太僕少卿舉羨

金歸庫嚴民遮道請留不可特為建生祠涖陝甫閱月歸展墓卒

據東莞志修

黃誥字汝綸少極貧日嘗負薪惟映月讀書性友愛與弟謨訓寢同衾出同衣嘉靖二十五年丙午成進士授臨海令值倭寇入犯備禦規畫皆中機宜遂挫其銳白水之捷斬獲甚眾當事攘為己功誥處之恬然遷定州知州改晉州調甯州晉吉安同知歸卒于家

據東莞志修

羅一道字貫卿逕背人嘉靖二十八年己酉庚戌連捷進士廷對語多切直有曰君德莫大于敬天而禱賽非敬天之實君道莫先于勤民而祈求非勤民之實也大學士徐階竒之擬首唱同列以為嫌抑寘二甲授刑部主事時嚴嵩當國子世蕃持權納賄嘗稱一道才或勸其少致饋可改美秩一道

謝曰升沉命也儒者當難進易退烏有贖貨以干進耶世蕃
 銜之十餘年不得調嵩罷稍遷至郎中錦衣校尉郭從科怙
 勢殺人冢宰司寇密屬為地且致千金執不可卒寘之法卹
 刑兩浙有朝貴誣民為盜廉得其情立釋之歷福建按察副
 使湖廣參政提督湖川貴三省糧儲故事輸餉者必以餘銀
 加錙上謂之滴珠一道首革之忤當道解組歸屢薦不起柘
 林戍兵變近郊民走避城中城已閉一道言于邑令開城納
 之所全萬計督學余立一道壬戌分枝所得士未嘗以一刺
 通子歲試置下等已而躋優等一道移書切責謂不宜有所
 私其方嚴如此年八十四卒所著有卹刑疏稿鍾山集

為中山存稿一道號中山
 云 據粵大記東莞志修

翟守謙字時益宋都魁龕之後幼警敏下帷憤志嘉靖三十

一年壬子以春秋舉高等己未署邵陽諭事勅啟聖賢宦祠
 佐以月俸御史莫抑學使張天復校湖南列第一檄領濂溪
 書院事等檄著邑志四十年辛酉典閩文衡稱得士丁憂補
 博野教諭尋陞保定令邑苦邊馬輸累至則請減常數之二
 以便民以誑誤調貴縣丁父憂隆慶四年庚午起補臨桂縣
 居會省之衝使者絡繹而府江古田洛容懷遠師徒繁興靖
 府宗人又恣睢干紀適有國故會葬册封諸費守謙悉為區
 畫所注措咸中肯綮里魁健漁獵為奸亟裁罷之摘其黨雷
 震起輩抵于法又剖疑獄均丈田却諸羨錢千餘金悉歸公
 橐間出行部妻子饘粥不繼時服其廉介萬曆元年癸酉入
 棘闈得徐生尙實等八人均有才名乙亥晉贛州郡倅管橋
 稅稅入盡歸公帑黃鄉郡酋執郡里官數請往討巡撫江某

壯之以疾乞骸骨不果卒于任歷官十五六載家無一畝可謂清白吏矣子繩祖有經世志嘗詣闕上書皆人所不能言者

據粵大記修

袁昌祚原名炳字茂文茶山橫岡人過目成誦有奇童稱爲文操筆立就弱冠舉嘉靖乙卯鄉試第一己未會試擬元以五策逾格落第一時傳誦其文隆慶辛未成進士知左州立義塾人始知學調夷陵王世貞雅重之與大學士徐階書曰夷陵州守袁昌祚爲文雅健且其人長者無援引地會修楚志屬爲總裁遷戶部員外郎擢廣西提學僉事轉四川參議時修乾清坤甯宮督材山中役辦而民不擾蜀人德之以憂歸起補廣西不赴優游巖壑三十年年七十九卒昌祚和易而介未嘗干郡邑以私嗜書老而彌篤與郭棊同修廣東省志

郡邑行鄉飲禮延爲上賓辭曰不肖生平無他長惟斷斷不願者四曰生不願賓鄉飲死不願祀鄉賢進不願款權門退不願病鄉里若此而已所著有樂律考莞沙文集

據東莞志修

鍾繼英字樂華別號心瞿先世有迪功郎諱亮者始家東莞茶園閣十七世至繼英父本成生八子繼英其季也生而穎秀年十五失怙母劉督教之勵志嗜學同宗藩參雲瑞甚奇之弱冠補郡庠弟子員讀書羊城同郡僉憲趙勳見其文嘆曰曠世才也遣二子訂交郡守謝彬試諸生居最于是名藉起嘉靖三十七年戊午以詩魁于鄉四十四年乙丑成進士入翰林隆慶元年改河南道

粵大記作雲南道

御史毅然以天下爲

己任時穆宗登極初御經筵首上疏乞日進講章以裨聖學又論掾給事石星時論躉之巡視北城無所阿徇故相張居

正以私憾欲甘心一武弁與太學生以意授之不可用是忤
居正是冬奉命巡鹺長蘆所至理枉伸冤多所昭雪中丞龐
尙鵬以西臺稱之適穆宗集宦者演內操繼英上疏請端習
尙以肅宮禁語極剴切親識多爲之危已而疏竟留中而內
操事亦罷又疏請推廣聖心隆繼述以成大孝疊疊數百言
大畧以護聖躬禮聖后導皇子爲當今急務上嘉納之他如
乞恩宥言官宏聖量以廣忠益乞優禮大臣崇國體以繫輿
情先後諸疏不一而足巡鹺事竣念母劉春秋高以疾請告
圖便歸省會有督學南畿之命疏上不報乃奉璽書疾馳過
家壽母而後就道南畿故稱才藪督學使者鮮克當士心旣
至藻鑑精確行部所至必令有司察貧士厚恤之諸生吳夢
熊宜興名士也校藝嘗賞諸首比邑歲稔惡少羣起剽掠吳

有庄僕格賊殺之惡黨起訟詞連于吳當事者不察文致大
辟繼英曰吳生文行並優非殺人者廉其冤而出之吳益奮
勵力學後領丙子鄉薦連捷春官皆繼英所玉成也庚午冬
以疾請疏再上予告歸癸酉神宗嗣位母命還朝復補御史
侍經筵嘗被綺幣之賜上疏乞推廣聖心及時圖治以培基
業疏內言多隱諷上覽奏有旨詰問諸縉紳皆危之繼英隨
以疏陳說上意頓解是歲丁母憂歸丙子服闋起補河南道
上疏條議考察事宜皆切中肯綮九月遷廣西提學副使于
時主行新法裁汰諸生嚴選貢士督學使者競爲操切以迎
合獨持正不回于是當道諷銓部創爲品第督學之例置繼
英于殿繼英曰易稱君子見幾而作不俟終日事幾若此其
容一朝居乎卽日投牒撫按不待報遽歸已而西粵撫按會

題乞准病銓錄用疏上銓部不為題覆壬午冬詣闕候調明年四月補授湖廣按察副使將入楚病作不果行抵家養病十年深居簡出嘗著式穀備遺一書以訓諸子皆道德倫理之言可以垂世者子六人鳴虞鳴夏鳴商鳴周鳴魯鳴齊皆

邑庠生據陳履撰傳 粵大記修

周繩武字允卿南海衛指揮僉事勇畧善戰歷連山瓊崖諸衛屢著奇功擢嶺南頭中哨遊擊隆慶戊辰從參將魏宗翰征海寇曾一本翰統戰艦泊雷州港連環為陣繩武與指揮李茂才力陳不可翰剛愎不聽卒被火攻茂才戰死賊乘勝突向會省時我兵新敗諸將倉皇畏縮繩武獨率所部拒之賊眾我寡奮勇邀擊歿于陣事聞賜進秩二階據張府志修尹瑾字崑潤萬家租人嘉靖四十三年甲子鄉薦隆慶五年

辛未進士授福建漳州府推官誅劇盜鍾乾華等號二十八將聲譽大震擢工科給事中轉兵科劾尚書王崇古晉吏科都給事中申救同官郭惟賢風節矯矯疏陳海防八議全粵賴之尋晉南太僕少卿工詩有集行世據郝通志修顧輝嘉靖中為夏陽巡檢未旬月流寇掠境輝統民兵禦之殺獲甚眾以兵少無援死之邑建義勇祠與勇士陳珪陳鐸

合祀焉據福建通志修

鍾昌字繼文北河人母夢星入懷而昌生隆慶元年丁卯鄉薦五年辛未進士授廣西陽朔知縣縣雜處獠獠而北獠尤悍租賦久不登昌至單騎按部諭以惟正之義令得以稻代銀為寬其斛量獠皆歡舞歲額頓盈先是田被夷侵遺稅在民苦賠累輒徙傍縣自昌至則壤成賦戶無虛稅流冗復業

昌又選獐獐中少俊加以衣履去其耳圈花繡徒跣之陋延塾師教導之一年間均能誦讀拜謁夷俗大變量移浙之義烏陽朔縣民赴闕乞留詔還任擢戶部主事權稅臨清監倉臨淮督課崇文門遂由郎中出知湖廣常德府丁父憂起補河南彰德庫故有二法馬以昂者入平者出昌毀其昂者徵給惟一遷福建鹽運使簡樸恬靜公暇臨池賦詩視羨金贖緩若將浼焉至于疏鹽法祛鹽蠹雖貴勢不為奪轉山東右參政嘗監泰山香稅攝司事籍羨餘數千緡歸公帑尋遷雲南按察使陞布政使以病乞休詔加大僕卿致仕年七十卒于家所著有碧松館詩集昌居官三十年用法平恕未嘗妄笞一人四司稅務一任鹺政皆處脂膏能以冰蘖自砥

福建通志修

據東莞志

梁煌哲別號生洲兩頭塘人性至孝然率本中庸無奇詭絕人之行母病刲股療之哲以為親之遺體固後于親者也親疾苟瘳夫亦何所愛焉嘗患背癰垂死謂其弟曰吾行矣吾左足大趾初一點寒如冰雪漸漸延及五趾由下而上至脛膝右足亦然乃指其臍曰寒至此中氣當絕矣其弟曰古人言死生之際正宜用力哲閉目須臾乃曰無可用力但念老母在堂情不能割中心如焚不覺火從臍起臍中之熱直驅兩足之寒其母趨至哲遂力疾起曰兒無恙寒氣退盡兩足仍溫矣已而病如脫癰亦旋愈論者謂哲性孝所致也哲大母歿水漿不入于口杖乃能行父歿亦如之母歿哀慟過傷里人為罷春未幾卒

據東莞志修

陳絢字衷素應辰十三世孫自少敦篤性峭直不能容人過

弱冠補邑庠生偕友人盧堯典袁應文周之翰輩讀書于道家山邑中子弟相率師事之絢誨之曰善學者因文見道不善學者離道求文欺慊之幾毫釐千里于是為紀善紀過簿以自考朋來曰眾隆慶四年庚午中鄉試第五名兩赴南宮弗售生平不私干有司然時有利病民有冤抑挺然入告必得白而後已慕鄉先達張鵬之賢立傳表之又倣范文正贍族之舉年四十而卒其志以一介不取為行以安時守道為賢云張鵬字子用一字伯翔亦東莞人精于易學嚴于義利弱冠為里塾師生徒敬信之中正德八年癸酉科鄉試任鄞縣學訓導東莞志平易恬靜以正學誨諸生凡束脩節餽皆力辭不受諸生貧者力資助之士論目為古人陞知蕪湖縣事調福建歸化所至有惠政民肖像祀焉同邑嘉靖乙卯舉

人袁以芳字景標亦以古人自期動不踰禮與陳絢並重鄉評後應西粵修志之聘卒于南甯人惜之據粵大記東莞志郭通志修

陳履字德基本名天澤隆慶五年辛未進士授蒲圻令移繁休甯俗尚輕靡健訟履以謹約化之丁父憂補崇德令遷蘇州海防同知先是有倭警遣兵船護華亭大學士徐階里第歲久猶歸餉金供給兵食履曰承平日久焉用守兵為相君賢吾不欲令有私役主者猶依違履堅持之徐聞果罷其徭遷戶部郎中監稅浙江歲大祲上疏請寬其程督儲蘇州擢廣西副使備兵蒼梧以病歸所著有懸榻齋詩集卒後祀休甯名宦孫文振康熙癸巳舉人據張府志修

袁應文字仲奎一字聚霞温塘人萬曆元年癸酉鄉薦授福建沙縣知縣下車詢民疾苦令父老條上擇而行之民有十

頌又計擒臺溪盜以治最擢御史出爲貴州僉事備兵曲靖峒會楊乘龍縱所部剽掠應文密設方畧檻致乘龍土司與緬甸構難以入寇告巡撫議討應文曰夷人相攻講張以致我師非實也軍興日費千金叢爾滇安所倚辦已偵緬果無一騎犯邊後巡撫陳某至復欲逞志于緬慮應文異已爲蜚語中之冢宰孫丕揚雅重應文得量移廣西遷雲南副使備兵臨安官軍討楊應龍移備都勻督播餉繼討皮林苗應文監其軍賊平敘先後功晉秩一等先在滇已加秩至是由參政晉臬使食二品俸備兵辰沅應文在黔久凡夷苗洞穴出沒處所皆洞悉有不用命輒擒而尸之羣蠻震懾境內肅然致政歸年八十二卒子崇友字伯益萬曆十九年辛卯鄉薦二十三年乙未進士有朝貴重其才名欲召致門下許以館

選崇友不往授福建南安令安多勢宦奪民產上官欲因而畀之崇友徑判與民宦度令強項不敢逞又多逋賦猾胥攬戶相匿爲蠹牢蔓不可致詰崇友嚴絕其弊課盈而民不擾嘉禾倉輸餉負運涉海病民而無益于軍前令唐愛申罷之有欲議復者力條其害乃止倭寇告警而城久圯具楨幹築之翼然雄峙中使權稅諸道崇友議南安地磽薄無可稅中使突入縣崇友適出民恐其歸見辱羣出拜迎中使稍憚然終不釋憾會藩司觀風過邑不能曲意阿承因引疾父老子弟遮道伏轅不能行郡守趙子偁親臨慰留尋調望江南安民祠于縣崇友賦性廉介祿入外一無所取每資用不繼皆仰給于應文應文笑曰兒爲清欲處乃翁以濁耶秩滿擢南京戶部主事授南昌知府不赴乞終養里居以直諒稱凡吏

治得失民生利病知無不言官嶺南者多咨焉天啟改元起
尙寶司丞趣駕至潛山託疾而返侍養二十年孝友純篤卒
之前數日沐浴出就邑館與知交相對而逝囊無餘貲有負
券在人遺命以所居館償焉縣令李模爲經紀其喪臨哭甚
哀行道莫不流涕著有讀老二十四章讀書十五則及春草

堂文集若干卷

據福建通志東莞志福建名宦志修

袁敬字敬德茶山人萬曆四年丙子舉人授天長令編立馬
戶清汰浮稅著績爲多敬善書工詩散藻流葩藹若出岫春
雲皎若寒潭秋水所著白雲集燕粵西征草人爭誦之子登
道字道生亦有水明樓詩與父並稱有潔癖遇俗士如豕負
塗篆隸圖書並工絕或比之襄陽米顛

據張府志修

黃應明字公兆萬曆七年己卯舉人爲奉化令甫至邑出諭

俗十五章勸民從化訟至立折吏胥無從索一錢持半日糧

卽得平反時有黃半仙之謠鄰邑權貴以訛法事囑峻拒之

爲所陰中竟以調去仕終漢陽別駕

據浙江通志修

謝貺字崇勳南社人萬曆七年己卯舉人以乙榜任道州學

正操履清慎褒賢勵不肖毫無所私分校南北闈遷知富川

廉明有聲量移建昌通判攝廣昌縣屢辨冤獄歸田後足跡

不至城府著有誠正堂集經世考藝文輯畧

據張府志修

尹守衡字用平年十六補諸生督府行縣衆皆跪迎守衡獨

長揖令異之萬曆十年壬午舉于鄉署清溪教諭分校楚闈

擢知新昌縣不善逢迎左遷趙府審理歸而杜門著書採洪

武以來政治人物勒成一百五卷名曰史竊論者以爲陳建

之後一人而已詩文有嬾菴集年八十三卒弟守禮字用敬

制行醇篤與李一麟善麟卒為經紀其家課麟子夢雷夢曰如已子相繼舉于鄉誤教學七篇以淑其門人曰士品士制士範士學士恥士養士課萬曆四十三年乙卯序膺歲薦授揭陽訓導日以其七篇者講解揭人士始知嚮學丁母憂補廣西思明府教授遇火葬禁同姓為婚先正風俗然後及學術建議以樂正子從祀孔廟雖不得請識者韙之未幾卒于任篋無一錢諸生相率殯焉長子魁昌字昌廷崇正九年丙子鄉薦次兆昌能佐父考覈李玉如刻書以傳據郝通志修尹遂祈字鏡陽橫岡人幼穎異抗志高遠少喜讀參同契凡河洛圖緯天文律歷風角望氣六壬太乙之書靡不研究既乃遜志江門之學以致虛守靜為要于世故澹如也年二十一舉萬曆七年戊子鄉薦二十年辛丑南宮奏名十二初授

閩令尋改同安中左商稅橫增累民力請蠲免與稅監力爭語急雜以方言稅監不知為粵音也以此落職怡然歸至贛州卒所著有天文備考陣法源流璣衡要旨天元玉策解及叢桂堂集二十卷藏于家子體震字恒復父卒時年十歲奉旅櫬歸望里門哭踊幾絕人稱其孝長能讀父書數奇不售文章經濟海內重之明季徵辟授中書科中書舍人未幾掛冠歸據金通志修

劉鴻漸字紹嘉石碣人年十五見王守仁論學提綱語曰此心體也謂之無惡可矣謂之無善可乎父校大奇之因盡出濂洛關閩之書使卒業鴻漸所得日厚遂擁臯比講學邑中一時執經者戶屨常滿其教法謂聖賢為學所稱主敬行恕大要都從人已事物外面分明處做起久之心無不在而仁

自至性自盡命自立矣先是嶺表之言理學者依違朱陸之間陳建獨宗考亭常作學菴通辨闡其同異時海內方錮溺朱子晚年定論之說陳書不行鴻漸力倡明之與楚人瞿九思反覆論難江漢名流見其書無不折服鴻漸又言功夫雖兼動靜而必從動始知行雖是合一而必自知始良知雖有可致而必從窮究事物始其及門陳國是方遂千阮一道相與闡揚所作格物要致知辨傳誦一時萬厯間粵東有識之士不盡墮諸家雲霧者鴻漸力也世稱為盤石先生年八十七歲卒

據東莞志修

陳國是字伯衡亭頭人從劉鴻漸學一日問白沙所得鴻漸曰白沙固是脫落瀟灑能超造物牢籠之外然畢竟近禪君自有清瀾先生學在不必求他也于是盡發學菴通辨諸書

讀之遂大有進益領萬厯二十八年庚子鄉薦授陵水教諭

遷建昌推官廉明不憚權貴斷獄多所平反移甯波通判不

就歸構精舍大究濂洛關閩之旨

據東莞志修

徐兆魁字策廷父應寅以歲貢授海陽教諭博學能詩文兆

魁萬厯十四年丙戌進士授行人轉御史巡按湖廣宗人以

廩祿不給聚譁為縣令所治羣閩至會城因上疏明縣令持

三尺繩之不為過言甚剴摯守陵璫孫政誣奏潛江鍾祥兩

令詔逮鍾祥令仍下撫按勾潛江治之兆魁奏撫按專制一

方無為內臣勾攝理二令皆賢不宜參削遂俱得免尋按福

建奏免閩兵援朝鮮閩人德之入掌河南道協理京察復按

順天丁外艱服闋巡視淮撫李三才不滿物議兆魁劾之奪

三才職擢太僕少卿晉正卿遷右僉都御史巡撫湖廣晉左

副都御史致仕天啟中起吏部左侍郎遷刑部尙書時逆璫用事屢起大獄誣皇親李承恩龍袍事擬辟兆魁爭之拂璫意有旨閑住既歸里矣及璫敗仍以贊導削籍年八十六卒

子鶴齡都督府都事彭齡貢生

據東莞志修

彭際遇字觀卿萬曆三十五年丁未進士授行人四十年主

黔試擢御史值邊事孔棘疏言人才進退關社稷安危語甚

梗直出按茶馬旋閱視甯夏貪墨望風去伍籍擇丁壯悉汰

虛糜遷大理寺丞晉少卿于庶獄多所平反疾終京邸

據東莞志修

修

陳鼎字玉鉉周塘人慷慨有奇氣八歲時聞父遇盜增城卽

號呼往求之萬曆十九年辛卯鄉薦授江西瑞昌知縣甫下

車值礦使至邑故無礦奸民將藉爲蠶食地鼎召主者告之

曰事以屬汝好爲之若擾吾地方則妻子抵法矣奸猾悚息

害得止尋以詩忤大吏調湖廣之漢川時楚宗人殺巡撫趙

可懷將挾楚王爲變所在皆設備鼎亟白御史曰安楚王而

擒治其宗人變可立弭也何以兵爲御史深然之卽令鼎謁

楚王陳說禍福王大悟立執數人送獄事遂定御史特疏薦

會遣疾卒鼎居官廉潔死之日囊無餘貲漢川民立祠祀焉

據東莞志修

鄧雲霄字元度竹園人由選貢中萬曆十三年順天甲午鄉

試十七年戊戌進士授蘇州長洲縣值飢力請賑給有因飢

攘奪者捕置諸法曰飢民吾子亂民吾賊也織造中使以酷

虐激變聚至數萬人上官失措雲霄挺身諭衆立取中使左

右數人議如律衆乃解決訟若神案無積牘日午卽進諸生

課文藝旋擢南京戶科給事中多所建白廣東直指誤聽稅監增餉十八萬疏力爭之遼將李某棄地効其有異謀請誅之不報後果啟覺竟陷遼陽居二年出為湖廣僉憲有苗賊劫殺官吏主兵者欲因之邀功雲霄傳檄而定苗亦伏辜轉四川參議以保留仍駐永州勢宦冤死平民廉得實置其家人于罪抗疏劾之遂歸復以薦起陝西兵備尋改廣西丁繼母憂歸不復出會有籍捕為盜者所至屠掠邑民擒送縣官紳士合詞訴之縣官與雲霄有隙誣以首難當事者遂中深文雲霄聞爰書發憤病卒一時莫不冤之長洲人聞之亦為位而哭後其子馮京上疏鳴冤始復原職著書甚多有百花洲浮湘越鳥吟燃桂漱玉齋竹浪齋紫烟樓鏡園等集行世

據姚希孟撰傳畧修

翟廷策字伯勳萬曆二十三年乙未進士除清流令為政務端士習革囂訟清浮糧興學設教具有條法竟以清淨致理分校鄉闈會要人屬為其子地廷策謝之幾被中傷遂調武康邑賦素重民以輸運為艱力請寬減歲省溢額米萬斛百姓德之尋卒于官

據張府志修

祁文友字蘭尚萬曆二十六年戊戌進士初為江南廬江令時有土豪以白金饋者文友即坐豪以法自是人不致妄干甲辰擢工部主事邑人任一泰以會試卒京邸文友力庀其喪歸東莞己酉典試江南庚戌督修張秋河以積勞致病告歸為人剛正不徇流俗年五十九卒著有出門草渡江集秋署吟諸詩稿

據張府志修

盧瑛田字虹仲增步人萬曆三十八年庚戌進士除戶部主

事督徐倉兼徐洪鈔關事竣舉美金一萬七千餘歸公帑歷員外郎中擢湖廣按察司副使時惠藩建邸荊州瑛田請以湘王廢邸改建毋毀民居報可詔賜福王莊括河南腴土不足派之楚楚撫欲如額瑛田力持不可王亦上疏辭得減半楚人德之奢崇明反圍成都兩臺檄瑛田往援瑛田簡精卒五千晝夜馳赴屢敗賊成都圍解賊將樊龍走保重慶瑛田與諸將圍之賊黨周鼎等分道來救勢甚銳平茶西陽石砭三土司兵皆却諸將議解圍瑛田曰賊內外得合軍其勢益張今賊兵雖眾而遠來力罷吾軍足以當之樊龍檻虎縱之非計殲賊復城在此一舉遂率所部先登斬八百餘級賊大敗鼓兵乘城遂復重慶凱還擢四川參政再遷河南按察使未至卒于官後敘平奢賊功贈太僕寺卿廕其子上銘累官

至工部主事據東莞志修

姚鈿號谷神萬曆四十七年己未進士筮仕嘉興推官郡故吏刁民悍凡有訟獄紳士多把持者鈿以剛直至誠遇獄必精心研勘務得其情期年而政聲大起歷遷稽勳司郎中給假還鄉戊寅轉光祿少卿己卯奉旨典試山西正主考辛巳陞順天府丞會推大理卿鈿以流寇充斥知時勢難挽上疏自陳致仕壬午抵家癸未八月卒年七十三著有先月樓稿

嘉禾據張府志修

陳秉良字惺然萬曆二十五年舉人授樂民令樂稅民重竈輕豪右詭寄巡鹽檄縣減竈之八百鏹移諸民秉良力爭獲免丁艱起補碭山歲飢秉良發倉出粟又捐金設賑全活甚多碭人建祠尸祝遷徽州同知以忤直指歸子應乾

國朝順治戊戌進士宜章知縣據東莞志修

樊王家字孟泰西湖人萬曆三十五年甲辰進士授江西廣

昌知縣蒞官三月邑大治調南昌值水旱頻仍發倉賑貸不

足出錢買粟給之築長堤以捍水患邑賴安堵奸民麀神者

糾宗室不逞之徒恣橫為害捕置諸法請王府逮治宗人奸

猾屏息四十一年擢工部主事督陵工丁母憂服闋復督三

殿工歷員外郎中遷鎮江知府會敘三殿功有旨以京職用

王家曰人臣東西南北惟君所使豈有以土木為功耶具疏

力辭轉廣西提學副使未仕卒王家居官慈惠而律已甚嚴

通籍十餘年不改寒素好學善文詞公餘輒手一編後崇祀

鄉賢弟王甯萬曆四十三年舉于鄉據張府志修

溫可正字尚修萬曆四十年壬子鄉薦授亳州牧移滇之南

安時鳳賊方熾州舊無城正至首興版築城成而賊大集授

兵登陴率所部禦之遂擒渠魁那珠者哥遷思南同知致政

歸卒祀鄉賢據東莞志修

趙響字心極宋進士必瑒九世孫瑒元孫鐸以諸生講授心

性著性道管窺諸書鐸孫霞士璧常同姚江講學響夙承家

學潛心性道蚤從鍾昌讀毛詩既而師事楊起元一日起元

問性有動靜乎曰有動有靜者心無動無靜者性問知能曰

知善知惡是良知為善去惡是良能知孝知弟知之至能孝

能弟能之盡起元然之授以羅盱江識仁編自是朝夕體驗

踐履益實一時名賢如黎民表袁昌祚唐伯元黎允儒區大

相韓曰纘輩皆樂與之遊生平以禮教為宗歲時祝釐趨踰

謹凜郡博董應舉雅重之時文廟猶塑像建言請遵制易木

主董遂陳諸督學從之事親孝備極色養有疾藥必親嘗居喪殯葬誠信三年不入內室祀先吉蠲拜獻肅如也推愛族黨貧不克婚葬者助之丙申歲祲賑粥逾月其慷慨仗義類然萬曆二十四年乙巳以明經薦于廷藏修十有三年所著諸經酌言嶺海志畧文廟崇祀志諸書據金通志修

王猷字允方城西人舉萬曆二十八年己酉鄉薦三十五年丙辰進士授行人冊封衡藩岷藩餽餉一無所受陞戶部主事視稅崇文門逆璫用事有建祠之諷猷嘆曰家有老父未堪從楊左之後事關名節豈效狐媚哉力求外補因出為泉州知府鄭芝龍擁眾逼城猷督兵壯捍禦屢挫其銳芝龍知不可犯退兵求撫猷集在籍大學士史繼階等二十八人于承天寺議剿撫兩策日旰未決少保黃克纘諮諸猷曰猷守

臣也知有守耳御史蘇炎曰守以盡守土之職撫以舒目前之憂不亦可乎議遂定時奸人思亂挑激芝龍忽信忽疑猷開示恩信始聽命其黨李魁奇既降復叛與餘黨鍾斌周三舍大肆焚掠閩海復震猷授畧芝龍剿之又捐俸築銃臺于鷓鴣溜石間以扼其險會官兵失利賊舟直抵內港猷身親督戰發巨礮擊沈其舟賊乃遁去擒酒醉老斬之復擒黃巽冲楊耀老等五十餘名生獲魁奇獻俘于朝周三舍鍾斌以次馘斬閩浙粵海氛以平陞興泉道副使卒于任泉民巷哭罷市後以功贈太僕寺卿祀泉州名宦本邑鄉賢據阮通志修張恂字士和宏濟子萬曆四十年鄉薦授保昌教諭擢衡州府同知時尚源盜熾恂檄官兵會剿擒渠魁王調鼎李朝伯等救回被虜良民萬計創置嘉禾新田二縣撫按交薦遷永

州知府地經川寇殘破恂勞徠撫綏詳請減派黔餉改食東
鹽流寇再犯鄖襄不敢窺永陽境擢湖廣兵備副使以病歸
詔晉太僕寺卿順治四年起兵據邑城大兵至城破自刎死
子景萬字福孺為諸生從恂官湖南剿賊有功授推官監連
陽軍以復城功擢兵部職方司主事監軍湖南駐藍山時有
楚弁擁重鎮以叛迫景萬降不屈大書絕命詞于藍山署壁
曰累世清白父子忠孝死而不朽受賀勿弔遂伏劍死據張府志

張二果字穉復東莞志選舉字荊公十四歲遊邑泮十七中鄉試乙榜

御史田生金特獎異之天啟七年丁卯舉于鄉見魏璫當國

不求仕達創建羅浮華首臺水簾洞山諸寺棲息其中崇正

丙子詔舉賢才督臣熊文燦科臣郭九鼎兩疏交薦不就戊

辰知縣汪運光請修邑志稱信史好佛卒于江西廬山今有

塔碑在焉所著多佛書據阮通志修

郭九鼎字聖襄大涌人性孝友忠直廉潔謙謹領天啟七年

丁卯鄉薦連登崇正元年進士初授行人遷工科給事中時

詔赦已頒有司未奉行九鼎疏為之請有旨嚴責實効海內

德之又疏救選司吳羽文侍郎陳子壯請卹死難副將何可

綱劾廠校魯國禮舉朝敬憚又請裁節內帑工費以濟目前

之急速敘秦蜀黔戰功以作三軍之氣皆得旨行轉禮科左

右給事首請改正先朝實錄毋令賢奸倒置復陳王官不得

攝篆仍行考察百姓不得投充王役皆言人所不敢言巡按

葛徵奇題豁粵東虛稅九鼎特揭速部清查粵民獲甦陞吏

科都給事請速考選補缺以收人材矢虛公枚卜以端揆席

所歷諫垣奏議侃侃正言直聲布中外尋卒于任詔給夫馬

護櫬歸土民哀之所著疏草為當世所推重云據阮通志修

袁崇煥字元素水南人進士題名碑廣西梧州府藤縣籍廣西通志選舉表作潯州府平南籍

萬曆三十四年丙午鄉薦四十七年己未進士授邵武知縣

為人慷慨負膽畧好談兵遇老校退卒輒與論塞上事曉其

阨塞情形以邊才自許天啟二年正月朝覲都御史侯恂請

破格用之擢兵部職方主事無何廣甯師潰廷議扼山海關

崇煥即單騎出閱關内外部中失袁主事訝之家人亦莫知

所往已還朝具言關上形勢曰予我軍馬錢穀我一人足守

此廷臣益稱其才超擢僉事監關外軍發帑金二十萬俾招

募時關外地悉為哈刺慎諸部所據崇煥乃駐守關内未幾

諸部受款經畧王在晉令崇煥移駐中前所監參將周守廉

遊擊左輔軍經理前屯衛事尋令赴前屯安置遼人之失業

者崇煥夜行荆棘虎豹中以四鼓入城將士莫不壯其膽在

晉深倚重之題為甯前兵備僉事然崇煥薄在晉無遠畧不

盡遵其令及在晉議築重城八里鋪崇煥以為非策爭不得

奏記首輔葉向高十三山難民十餘萬久困不能出大學士

孫承宗行邊崇煥請將五千人駐甯遠以壯十三山勢別遣

驍將救之甯遠去山二百里便則進據錦州否則退守甯遠

奈何委十萬人置度外承宗謀于總督王象乾象乾以關上

軍方喪氣議發插部護關者二千人往承宗以為然告在晉

在晉竟不能救眾遂沒脫歸者僅六千人而已及承宗駁重

城議集將吏謀所守閭鳴泰主覺華崇煥主甯遠在晉及張

應吾刑慎言持不可承宗竟主崇煥議已承宗鎮關門益倚

崇煥崇煥內拊軍民外飭邊備勞績大著崇煥嘗核虛伍立
斬一校承宗怒曰監軍可專殺耶崇煥頓首謝其果於用法
類此三年九月承宗決守甯遠僉事萬有孚劉詔力阻不聽
命滿桂偕崇煥往初承宗令祖大壽築甯遠城大壽度中朝
不能遠守築僅十一且疎薄不中程崇煥乃定規制高三丈
二尺雉高六尺址廣三丈上二丈四尺大壽與參將高見賀
謙分督之明年迄工遂爲關外重鎮桂良將而崇煥勤職誓
與城存亡又善撫將士樂爲盡力由是商旅輻輳流移駢集
遠近望爲樂土遭父憂奪情視事四年九月偕大將馬世龍
王世欽率水陸馬步軍萬二千東巡廣甯謁北鎮祠歷十三
山抵右屯遂由水道泛三岔河而還尋以五防敘勞進兵備
副使再進右參政崇煥之東巡也請節復錦州右屯諸城承

宗以爲時未可乃止至五年夏承宗與崇煥計遣將分據錦
州松山杏山右屯及大小凌河繕城郭居之自是甯遠且爲
內地開疆復二百里十月承宗罷高第來代謂關外必不可
守令盡撤錦石諸城守具移其將士于關內督屯通判金啟
宗上書崇煥曰錦石大凌三城皆前鋒要地倘收兵退旣安
之民庶復播遷已得之封疆再淪沒關內外堪幾次退守耶
崇煥亦力爭不可言兵法有進無退三城已復安可輕撤錦
石動搖則甯前震驚關門亦失保障今但擇良將守之必無
他慮第意堅且欲并撤甯前二城崇煥曰我甯前道也官此
當死此我必不去第無以難乃撤錦州右屯大小凌河及松
山杏山塔山守具盡驅屯兵入關委棄米粟十餘萬死亡載
途哭聲震野民怨而軍益不振崇煥遂乞終制疏曰爲君恩當報子道難

虧伏乞聖明俯容守制以重彝倫以崇孝治事緣臣以寧前
 道于前月二十二日接家報臣父袁子鵬于七月初五日
 疾歿里門當即申報督撫隨蒙撫院批允即交關內道副使
 劉詔署掌臣即移會戶部管餉員外唐登雋及關內道又牌
 行各廳陸運同知毛宗棖等查有本道經批不明錢糧可乘
 道在任查明隨結印結申報各督撫餉關衙門奉閣撫批
 俱有甘結隨即粘連印結申報各督撫餉關衙門奉閣撫批
 允離任已于本月初二日辰行北至豐潤縣接邸報該總督
 薊遼吳用光題為甯前衝缺道藩籬頓虛懇乞聖明就近允
 補以濟急需事奉聖旨甯前重地袁崇煥不准守制著照舊
 供職竊謂臣小臣也以知縣而擢用則皇上特旨之所留也
 山石道公錯而被糾則皇上特旨之所寬也茲奪情又蒙特
 旨矣從來外吏所無之殊遇萃臣一身臣即捐糜無足云報
 尚為守制蓋制之所定而不可踰易也先王以孝治天下孝
 之為言教也又考也教天下以孝而治成也我皇上德隆虞
 舜化比成周正以孝道致治三年之愛一本之思度越前代
 獨以邊徼小臣限之以守制之情貽之以終天之恨固將為
 封疆計也然臣已在關上四年矣熱心自許力阻時違毫無
 建立雖皇上不以為罪臣心則以為為慚即無憂當去况大故
 相推哀毀之過神情惻悼方寸無主安足以再辦機宜骨立
 形消即拜起俱倩人扶此畿東府縣官所見者安能馳驅戎
 馬如前日蓋勢無可留而臣之情不容已又力不可支徒棄
 禮廢法以速罪戾此臣義之所不敢出也若夫家變突遭臣

一刻難安而縮地無術一己之私又不敢控之皇上者也伏
 乞皇上察臣烏鳥至情容臣回籍終制臣倘不從先臣地下
 過此有生之年皆皇上犬馬之日也臣外吏也例該呈撫院
 代題但臣已繳過印勅趨程在道為此具本差家人袁相恩
 具奏為君恩當報子道難虧伏乞皇明俯容守制以重彝倫
 日奏為君恩當報子道難虧伏乞皇明俯容守制以重彝倫
 以崇孝治事奉聖旨邊疆重任袁崇煥著遵前旨照舊供職
 不必再陳該部知道欽此竊惟臣何官也而再辱皇上之明
 命將趨踰捐糜之暇何敢再陳但守制大典至大典之明
 克遂則曰奪情夫情而上軍中少長有禮經心為殘忍殘忍拂經
 何顏以身執紀將吏之兵士而天理良心寸衷有赫臣亦欲奪
 律之身執紀將吏之兵士而天理良心寸衷有赫臣亦欲奪
 情而情之不可奪者已煎灼于臣之肺腑矣况臣絕裾以出
 臣父再見無期砥犢之思憂鬱而歿臣父之死因臣而臣之
 身不還之于父令其九原胎痛仍是望子之魂一夫足關天
 地之和是父是子遂不足動皇上的惻隱乎若從封疆起見
 代臣者壯心偉畧過臣數倍閣督撫之為封疆計當不負皇
 上若敵情之急臣必哀服臨戎自不能去焉用皇上之督促
 憶廣甯初潰之日皇上何嘗督促而臣自匹馬邁行身既在
 朝為臣死忠業已蒙皇上之許可今終天之恨為子死孝獨
 不蒙皇上之矜憐如使臣還任而有補也臣亦何惜裂此身
 之檢以為皇上馳驅但聞訃至今淚血已枯氣息將盡即死
 強撐離魂之殼以回車終必哀毀憂思而待盡皇上留一死
 臣以在邊用而不得用何如放一生臣以還里不用而後日

仍用之此臣極悲極苦瀝血而再控之皇上者也臣豈不知
 身位微薄不宜再瀆天聽然悲從中來遂已冒皇上之斧鉞
 矣伏乞皇上孝思遐布恩恤臣私容臣回籍守制用其身而
 且獨其隱天下將仰明主之能曲體臣私應馬骨以來者不
 期而至矣臣再冒天威再疏不允乃乞給假疏曰為仰遵明
 不勝悚懼傾越之至
 旨俯察臣心曲全孝道事該臣于本月十五日奏前奉聖
 旨袁崇煥身任疆場本朝原有起復故事如何堅求守制顯
 是避難推諉姑不究還著遵旨行不必再來瀆擾該部知道
 欽此除臣力疾設香案望闕叩頭謝恩外竊念皇上刻意求
 治簡賢擇能凡叨任使之榮俱慶風雲之遇倘有沈抑下寮
 欲効犬馬而不可得者臣三奉明綸委任愈切若不當去而
 去與當留而不留臣無論負明主且昧本心將狗彘不食臣
 猶情根于性豈可以事移亂制拂情必無法之地與無人之
 野而後可語曰求忠臣于孝子之門臣今守制奔喪猶天啟
 二年之策馬出塞也彼時臣敢以父子之私而緩視疆場之
 急皇上將禁之不令往乎今敵情稍緩屯種有方臣得以離
 任之日值茲大變又無容臣不離任之時奪情往或有之然
 皆苟且功名甘蒙清議臣素知大義忍逆天常此制之萬無
 可留者也若臣之情愈苦矣臣自萬曆四十七年幸叨一第
 即授合之閩離家今七年矣七年中臣之嫡兄崇燦喪矣嫡
 叔子騰喪矣堂兄生員崇茂育于臣父為猶子者今亦喪矣
 諸喪暴露各有家口俱待食于臣父臣父非有厚產不過終

歲拮据今臣父已矣止一幼弟崇煜少不諳事一切生待養
 而待待葬者俱一人自為令至今未嘗餘一錢以負陛下昨
 聞計之日諸臣憐臣之不能為行李自閣督撫以下釀金為
 聘臣擇而受之束裝遄歸以襄臣大事此外如臣叔臣兄死
 為之葬生為之安臣養不及臣父猶不致貽臣父含痛九原
 此臣明發血心又甚于不可已之制者也披瀝再陳未蒙俞
 允自維封疆小吏力薄誠微生殺去留惟皇上所命皇上綱
 常名教主尊皇上即所以重倫常此臣所以不敢再求終喪
 而轉求給假者蓋情之萬萬不獲已者也伏望皇上孝治天
 下仁及南荒下部議覆姑准臣給假回籍臣鄉九千里百日
 可到往還二百日又以百日襄臣父窀穸之事并經紀叔兄
 暴露未葬之三喪凍餒無依之八口臣即策馬前來計此時
 皇上天威廓清邊塞而經營疆理尚自需人臣更不敢圖官
 爵舉家屯種可佐軍儲此臣狗馬之心矢之天日者也如皇
 上封疆念重不容臣守制又不容臣給假臣再敢有詞哉惟
 抱臣父之靈于通州涕泣以死與先魂相依于地下皇上即
 責臣負恩臣知罪矣為此具奏
 臣三冒天威不勝死罪之至
 奉旨袁崇煥不以君命為重
 連章瀆擾還著遵旨供職不准給假十二月進按察使視事
 如故我

大清知經畧易與六年正月舉大軍西渡遼河二十三日抵

甯遠崇煥聞卽偕大將桂副將左輔朱海參將大壽守備何可剛等集將士誓死守崇煥更刺血爲書激以忠義爲之下拜將士咸請効死乃盡焚城外民居攜守具入城清野以待令同知程維模詰奸通判啟侗具守卒食辟道上行入檄前屯守將趙率教山海守將楊麒將士逃至者悉斬人心始定明日大軍進攻戴楯穴城矢石不能退崇煥令閩卒羅立發西洋巨礮傷城外軍明日再攻復被却圍遂解而啟侗亦以然礮死初中朝聞警兵部尙書王永光大集廷臣議戰守無善策經畧第總兵麒竝擁兵關上不救中外謂甯遠必不守及崇煥以書聞舉朝大喜立擢崇煥右僉都御史璽書獎勵桂等進秩有差我

大清初解圍分兵數萬畧覺華島殺參將金冠等及軍民數

萬崇煥方完城力竭不能救也高第鎮關門大反承宗政務折辱諸將諸將咸解體遇麒若偏裨麒至見侮其卒至是坐失援第麒並褫官去而以王之臣代第趙率教代麒我

大清舉兵所向無不摧破諸將罔敢議戰守議戰守自崇煥始三月復設遼東巡撫以崇煥爲之魏忠賢遣其黨劉應坤紀用等出鎮崇煥抗疏諫不納敘功加兵部右侍郎賚銀幣世廕錦衣千戶崇煥旣解圍志漸驕與桂不協請移之他鎮乃召桂還崇煥以之臣奏留桂又與不協中朝慮僨事命之臣專督關內以關外屬崇煥畫關守崇煥虞廷臣忌已上言陛下以關內外分責二臣用遼人守遼土且守且戰且築且屯屯種所入可漸減海運大要堅壁清野以爲體乘間擊瑕以爲用戰雖不足守則有餘守旣有餘戰無不足顧勇猛圖

敵敵必讐奮迅立功衆必忌任勞則必召怨蒙罪始可有功怨不深則勞不著罪不大則功不成謗書盈篋毀言日至從古已然惟聖明與廷臣始終之帝優旨褒答其冬崇煥偕應坤用率教巡歷錦州大小凌河議大興屯田漸復第所棄舊土忠賢與應坤等並因是廕錦衣崇煥進所廕爲指揮僉事崇煥遂言遼左之壞雖人心不固亦緣失有形之險無以固人心兵不利野戰祇有憑堅城用大礮一策今山海四城旣新當更修松山諸城班軍四萬人缺一不可帝報從之先是八月中我

太祖高皇帝晏駕崇煥遣使弔且以覘虛實我

太宗文皇帝遣使報之崇煥欲議和以書附使者還報我

大清兵將討朝鮮欲因此阻其兵得一意南下七年正月再

遣使答之遂大興兵渡鴨綠江南討朝議以崇煥之臣不相能召之臣還罷經畧不設以關內外盡屬崇煥與鎮守中官應坤並便宜從事崇煥銳意恢復乘大軍之出遣將繕錦州中左大凌三城再使使持書議和會朝鮮及毛文龍同告急朝命崇煥發兵援崇煥以水師援文龍遣左輔率教朱梅等九將將精卒九千先後逼三岔河爲牽制之勢而朝鮮已爲大清所服諸將乃還崇煥初議和中朝不知及奏報優旨許之後以爲非計頻旨戒諭崇煥欲藉是修故疆持愈力而朝鮮及文龍被兵言官因謂和議所致四月崇煥上言關外四城雖延袤二百里北負山南阻海廣四十里爾今屯兵六萬商民數十萬地隘人稠安所得食錦州中左大凌三城修築必不可已業移商民廣開屯種倘城不完而敵至勢必撒還

是棄垂成功也故乘敵有事江東姑以和之說緩之敵知則三城已完戰守又在關門四百里外金湯益固矣帝優旨報聞時率教駐錦州護版築朝命尤世祿來代又以輔爲前鋒總兵官駐大凌河世祿未至輔未入大凌五月十一日

大清兵直抵錦州四面合圍率教偕中官用嬰城守而遣使議和欲緩師以待救使三返不決圍益急崇煥以甯遠兵不可動選精騎四千令世祿大壽將繞出大軍後決戰別遣水師東出相牽制且請發薊鎮宣大兵東護關門朝廷已命山海滿桂移前屯三屯孫祖壽移山海宣府黑雲龍移一片石薊遼總督閻鳴泰移關城又發昌平天津保定兵馳赴上關檄山西河南山東守臣整兵聽調世祿等將行

大清兵已于二十八日分兵趨甯遠崇煥與中官應坤副使

畢自肅督將士登陴守列營濠內用礮距擊而桂世祿大壽大戰城外士多死桂身被數矢大軍亦旋引去益兵攻錦州以溽暑不能克士卒多損傷六月五日亦引還因毀大小凌河二城時稱甯錦大捷桂率教功爲多忠賢因使其黨論崇煥不救錦州爲暮氣崇煥遂乞休而以王之臣代爲督師兼遼東巡撫駐甯遠及敘功文武增秩賜廕者數百人忠賢子亦封伯而崇煥止增一秩尙書霍維華不平疏乞讓廕忠賢亦不許未幾熹宗崩莊烈帝卽位忠賢伏誅削諸冒功者廷臣爭請召崇煥其年十一月擢右都御史視兵部添注左侍郎事崇正元年四月命以兵部尙書兼右副都御史督師薊遼兼督登萊天津軍務所司敦促上道七月崇煥入都先奏陳兵事帝召見平臺慰勞甚至咨以方畧對曰方畧已具疏

中臣受陛下特眷願假以便宜計五年全遼可復帝曰復遼朕不吝封侯賞卿努力解天下倒懸卿子孫亦受其福崇煥頓首謝帝退少憩給事中許譽卿叩以五年之畧崇煥言聖心焦勞聊以是相慰耳譽卿曰上英明安可漫對異日按期責效奈何崇煥憮然自失頃之帝出即奏言東事本不易竣陛下既委臣臣安敢辭難但五年內戶部轉軍餉工部給器械吏部用人兵部調兵選將須中外事事相應方克有濟帝爲飭四部臣如其言崇煥又言以臣之力制全遼有餘調衆口不足一出國門便成萬里忌能妬功夫豈無人即不以權力掣臣肘亦能以意見亂臣謀帝起立傾聽諭之曰卿無疑慮朕自有主持大學士劉鴻訓等請收還之臣桂尙方劍以賜崇煥假之便宜帝悉從之賜崇煥酒饌而出崇煥以前此

熊廷弼孫承宗皆爲人排搆不得竟其志上言恢復之計不外臣昔年以遼人守遼土以遼土養遼人守爲正著戰爲奇著和爲勞著之說法在漸不在驟在實不在虛此臣與諸邊臣所能爲至用人之人與爲人用之人皆至尊司其鑰何以任而勿貳信而勿疑蓋馭邊臣與廷臣異軍中可驚可疑者殊多但當論成敗之大局不必摘一言一行之微瑕事任既重爲怨實多諸有利于封疆者皆不利于此身者也况圖敵之急敵亦從而間之是以爲邊臣甚難陛下愛臣知臣臣何必過疑懼但中有所危不敢不告帝優詔答之賜蟒玉銀幣疏辭蟒玉不受是月川湖兵戍甯遠者以缺餉四月大譟餘十三營起應之縛繫巡撫畢自肅總兵官朱梅通判張世榮推官蘇涵瀄于譙樓上自肅傷重兵備副使郭廣初至躬翼

自肅括撫賞及朋椿二萬金以散不厭貸商民足五萬乃解
自肅疏引罪走中左所自經死崇煥以八月初抵關聞變馳
與廣密謀省首惡楊正朝張思順令捕十五人戮之市斬知
謀中軍吳國琦責參將彭簪古黜都司左良玉等四人發正
朝思順前鋒立功世榮涵瀄以貪虐致變亦斥之獨都司程
大樂一營不從變特爲獎勵一方乃靖關外大將四五人事
多掣肘後定設二人以梅鎮甯遠大壽仍駐錦州至是梅將
解任崇煥請合甯錦爲一鎮大壽仍駐錦州加中軍副將何
可剛都督僉事代梅駐甯遠而移薊鎮率教于關門關內外
止設二大將因極稱三才謂臣自期五年專藉此三人
當與臣相終始屆期不效臣手戮三人而身歸死于司敗帝
可之崇煥遂留鎮甯遠自肅既死崇煥請停巡撫及登萊巡

撫孫國楨免崇煥又請罷不設帝亦報可哈刺慎二十六家
向受撫賞後爲插漢所迫且歲飢有叛志崇煥召至于邊親
撫慰皆聽命二年閏四月敘春秋兩防功加太子太保賜蟒
衣銀幣陰錦衣千戶崇煥始受事卽欲誅毛文龍文龍者仁
和人以都司援朝鮮逗留遼東遼東失自海道遁回乘虛襲
殺

大清鎮江守將報巡撫王化貞而不及經畧熊廷弼兩人隙
始開用事者方主化貞遂授文龍總兵累加至左都督掛將
軍印賜尙方劍設軍鎮皮島如內地皮島亦謂之東江在登
萊大海中綿亘八十里不生草木遠南岸近北岸海面八十
里卽抵

大清界其東北海則朝鮮也島上兵本河東民自天啟元年

河東失民多逃島中文龍籠絡其民爲兵分布哨船聯接登州以爲犄角計中朝是之島事由此起四年五月文龍遣將沿鴨綠江越長白山侵

大清國東偏爲守將擊敗衆盡殲八月遣兵從義州城西渡江入島中屯田

大清守將覺潛師襲擊斬五百餘級島中糧悉被焚五年六月遣兵襲耀州之官屯寨敗歸六年五月遣兵襲鞍山驛喪其卒千餘越數日又遣兵襲撤爾河攻城南爲

大清守將所却七年正月

大清兵征朝鮮并規剿文龍三月

大清兵克義州分兵夜擣文龍于鐵山文龍敗遁歸島中時大清惡文龍躡後故致討朝鮮以其助文龍爲兵端顧文龍

所居東江形勢雖足牽制其人本無大畧往輒敗衄而歲糜餉無算且惟務廣招商賈販易禁物名濟朝鮮實闌出塞無事則鬻參販布爲業有事亦罕得其用工科給事中潘士聞劾文龍糜餉殺降尙寶卿董茂忠請撤文龍治兵關甯兵部議不可而崇煥心弗善也嘗疏請遣部臣理餉文龍惡文臣監制抗疏駁之崇煥不悅及文龍來謁接以賓禮文龍又不讓崇煥謀益決至是遂以閱兵爲名泛海抵島文龍來會崇煥與相燕飲每至夜分文龍不覺也崇煥議更營制設監司文龍佛然崇煥以歸鄉動之文龍曰向有此意但惟我知東事東事畢朝鮮衰弱可襲而有也崇煥益不悅以六月五日邀文龍觀將士射先設幄山上令參將謝尙政等伏甲士幄外文龍至其部卒不得入崇煥曰予詰朝行公當海外重寄

受予一拜交拜畢登山崇煥問從官姓名多毛姓文龍曰此皆子孫崇煥笑曰爾等積勞海外月米止一斛言之痛心亦受予一拜爲國家盡力衆皆頓首謝崇煥因詰文龍違令數事文龍抗辯崇煥厲色叱之命去冠帶繫縛文龍猶倔強崇煥曰爾有十二斬罪知之乎祖制大將在外必命文臣監爾專制一方軍馬錢糧不受核一當斬人臣之罪莫大欺君爾奏報盡欺罔殺降人難民冒功二當斬人臣無將將則必誅爾奏有牧馬登州取南京如反掌語大逆不道三當斬每歲餉銀數十萬不以給兵月止散米三斗有半侵盜軍糧四當斬擅開馬市于皮島私通外番五當斬部將數千人悉冒己姓副將以下濫給札付千走卒輿夫盡金緋六當斬自甯遠還剽掠商船自爲盜賊七當斬強取民間子女不知紀極部下效尤人不安室八當斬驅難民遠竊人參不從則餓死傷

上白骨如莽九當斬輦金京師拜魏忠賢爲父塑冕旒像于島中十當斬鐵山之敗喪軍無算掩敗爲功十一當斬開鎮八年不能復寸土觀望養敵十二當斬數畢文龍喪魂魄不能言但叩頭乞免崇煥召諭其部將曰文龍罪狀當斬否皆惶怖唯唯中有稱文龍數年勞苦者崇煥叱之曰文龍一布衣耳官極品滿門封廕足酬勞何悖逆如是乃頓首請旨曰臣今誅文龍以肅軍諸將中有若文龍者悉誅臣不能成功皇上亦以誅文龍者誅臣遂取尙方劍斬之帳前乃出諭其將士曰誅止文龍餘無罪當是時文龍麾下健校悍卒數萬憚崇煥威無一敢動者于是命棺殮文龍明日具牲醴拜奠曰昨斬爾朝廷大法今祭爾僚友私情爲下淚乃分其卒二

萬八千爲四協以文龍子承祚副將陳繼盛參將徐敷奏游擊劉興祚主之收文龍敕印尙方劍令繼盛代掌犒軍士檄撫諸島盡除文龍虐政還鎮以其狀上聞末言文龍大將非臣得擅誅謹席蓁待罪時崇正二年五月也帝驟聞意殊駭念旣死且方倚崇煥乃優旨褒答俄傳諭暴文龍罪以安崇煥心其爪牙伏京師者令所司捕之崇煥上言文龍一匹夫不法至此以海外易爲亂也其衆合老稚四萬七千妄稱十萬且民多兵不能二萬妄設將領千今不宜更置帥卽以繼盛攝之于計便帝報可崇煥雖誅文龍慮其部下爲變增餉銀至十八萬然烏弁失主帥心漸攜益不可用其後致有叛去者崇煥言東江一鎮牽制所必資今定兩協馬軍十營步軍五歲餉銀四十二萬米十三萬六千帝頗以兵減餉增爲

疑以崇煥故特如其請崇煥在遼與率教大壽可剛定兵制漸及登萊天津及定東江兵制合四鎮兵十五萬三千有奇馬八萬一千有奇歲費度支四百八十餘萬減舊一百二十餘萬帝嘉獎之文龍旣死甫踰三月我

大清兵數十萬分道入龍井關大安口崇煥聞卽督大壽可剛等入衛以十一月十日抵薊州所歷撫甯永平遷安豐潤玉田諸城皆留兵守帝聞其至甚喜温旨褒勉發帑金犒將士令盡統諸道援軍俄聞率教戰歿遵化三屯營皆破巡撫王元雅總兵朱國彥自盡

大清兵越薊州而西崇煥懼急引兵入護京師營廣渠門外

史藁作沙河門外帝立召見深加慰勞咨以戰守策賜御饌及貂裘

崇煥以士馬疲敝請入休城中不許出與

大軍鏖戰互有殺傷時所入隘口乃薊遼總理劉策所轄而崇煥甫聞變卽千里赴救自謂有功無罪然都人驟遭兵怨謗紛起謂崇煥縱敵擁兵朝士因前通和議誣其引敵脅和將爲城下之盟帝頗聞之不能無惑會我

大清設間謂崇煥密有成約令所獲宦官知之陰縱使去其人奔告于帝帝信之不疑十二月朔再召對遂縛下獄大壽在旁戰栗失措出卽擁兵叛歸大壽嘗有罪孫承宗欲殺之愛其才密令崇煥救解大壽以故德崇煥懼并誅遂叛帝取崇煥獄中手書往召大壽乃歸命方崇煥在朝嘗與大學士錢龍錫語微及欲殺毛文龍狀及崇煥欲成和議龍錫嘗移書止之龍錫故主定逆案魏忠賢遺黨王永光高捷袁宏勳史堇輩謀興大獄爲逆黨報讐見崇煥下獄遂以擅主和議

專戮大帥二事爲兩人罪捷首疏力攻堇宏勳繼之必欲并誅龍錫法司坐崇煥謀叛龍錫亦論死三年八月遂磔崇煥于市兄弟妻子流三千里籍其家崇煥無子家亦無餘資天下冤之崇煥旣縛大壽潰而去武經畧滿桂以趣戰急與大清兵戰竟死去縛崇煥時甫半月初崇煥妄殺文龍至是帝誤殺崇煥自崇煥死邊事益無人明亡徵決矣乾隆四十七年欽奉

上諭朕披閱明史袁崇煥督師薊遼尙能忠于所事而其時主閭政昏不能罄其忱悃以致身罹重辟深可憫惻

特加恩官其五世孫炳爲峽江縣丞嘉慶元年崇祀鄉賢

實錄明史本傳東莞志修

陳策字純伯城內人舉萬曆十四年武會試授廣西左衛所

鎮撫擢恩陽守備以剿珠池盜李茂功遷游擊攝廣州海防
參將二十六年二月從總兵陳璘擊倭朝鮮分備露梁島會
平秀吉死倭眾遁歸璘遣諸將邀擊焚其舟賊大敗焚溺死
者萬計倭平復從陳璘督湖廣兵征播賊敗賊于白泥追奔
至龍溪山偵知賊有伏用火器擊之賊大潰楊應龍授首遂
移剿皮林苗斬獲甚眾恢復永從縣改四川疊戎遊擊積功
至副總兵鎮撫建南在鎮十六年威信大著嘗攝知州事民
夷懷之萬曆末督川兵援遼充援剿總兵官天啟元年經畧
袁應泰欲城清河撫順議三路出師用大將十人各將兵萬
餘策當其一未行而大兵已逼瀋陽策與總兵童仲揆馳救
次渾河聞瀋陽陷遊擊周敦吉與石砮都司秦邦屏先渡河
營橋北策及仲揆副將戚金參將張名世統浙兵三千營橋

南邦屏等先敗沒他將走入策營被圍數匝副將朱萬良姜
弼不救及圍急始前一戰即敗走大兵盡銳攻策營策殊死
戰眾寡不敵遂大潰策先戰死諸將皆敗沒事聞贈少保左
都督增世廕三級再廕本衛指揮僉事世襲賜祭葬建祠曰
忠愍子兆蘭武舉積功至都督僉事兆秋襲指揮兆夏字醇
伯天啟七年丁卯舉人兆熊以從征功世襲千戶同邑有關
鎮明者字節所萬曆十六年戊子三科武舉以鎮撫從策援
遼亦戰死渾河贈都指揮僉事

據東莞志修

謹案阮通志云新會志另有一陳策萬曆四十四年
丙辰歲貢初授封川訓導定安教諭江西瑞州教授
敦倫紀礪名節有江門宗風制府熊文燦榜其居曰
嶺南碩望壽九十八著有愛竹齋詩二卷

廣州府志 卷三十四
蕭奕輔字翼猷麻涌人父道爲沅陵簿民苦邊運力請得改折民甚德之奕輔登天啟元年辛酉鄉薦二年壬戌進士授福建長汀令丁內艱貧不克舉喪邑紳林向陽賻之乃成殮起補河南葉縣邑有銀礦民輸萬金請開採却之擢廣西道御史巡按浙江會海寇嘯聚捐俸造戈船百艘置勁兵台處諸城資以保障時浙再旱禱雨隨車而澍民有蕭霖之頌旋差印馬西陲刷卷南畿所在著聲遷太僕寺少卿晉僉都御史出撫福建召對問何以安攘奕輔奏破情面去奸貪正己率屬不要錢不惜死上喜曰爾能行之東南有瘳矣賜食御前時羣盜陳虎關曰奎並起陳佳尤熾僭號大楚奕輔以奇兵擒曰奎蹙虎而招之督知州揭重熙參將陳秀等大破佳于海上斬之又平巨寇陳倍贊吳救貧全閩以安以功加服

俸三級以時議不合告歸韶連有警捐六白金建東北礮臺以資捍禦卒年六十五奕輔爲人忠慎誠篤子姪以高皇帝刻像粘書室奕輔入見遽趨出命敬緘之曰此太祖御容何可褻也梨園演武宗遊幸事亟起立戒伶人罷去家居朔望必望闕拜如禮其祇敬如此

據東莞志浙江通志福建通志修

尹明翼字美鄰鷓鴣坑人天啟四年甲子鄉薦五年乙丑進士除汝甯府推官七年聘校浙閩時內臣李實在浙爲魏忠賢立祠強明翼爲記期以榜後明翼陰戒僕馬甫撤闈卽疾馳出境嘗自撫其足曰不久勞汝三木矣汝甯亦奉檄建祠明翼方攝府事拒之忠賢聞將逮治會敗乃止擢御史彈首輔周延儒得旨切責出知河南府時流寇數十萬塞洛口延儒計以此陷之明翼核餉蒐卒悉力捍禦賊不能犯引去丁

內艱歸卒于家

據東莞志修

陳象明字麗南父葆一家貧力學為諸生有隱德象明生而岐嶷年十四食餼天啟七年丁卯舉于鄉崇正元年戊辰成進士授戶部主事權稅淮安免厘市魚湖諸例稅及商賈例耗會水漲淹沒者眾懸賞格能救一人者予三十金多賴存活嘗遣家人返里過十八灘遇盜盜知象明物相戒遁去陞湖廣司員外郎轉陝西司郎中出為南昌知府中涓勒餽金不應抑不得赴踰年改補長沙訟獄多所平反正已律下有屬官一縑為壽怒撻其僕民間供億秋毫無所受時有佛祖大爺之目御史巡方失郊迎以此中傷謫浙江鹽運副百姓罷市三日立祠以祀後二年任饒州遷湖廣副使備兵湖南未至任聞變具衣冠拜畢欲投鄱陽湖各州士民再四勸乃

止因便道趨家與父訣父麾之出口行矣勉之毋以老人為念唐王時總督何騰蛟令徵餉廣西會永明王立廣東地盡失象明調土兵與陳邦傳連營東至梧州榕樹潭遇大兵戰敗死之二妾在南甯聞報亦自盡餘一僕護屍歸至殮時已八日面色如生父哭而復喜曰是真吾兒矣卹贈太僕寺正卿著有兵畧一百三十卷塵外賞諸書

國朝賜諡烈愍予祀忠義祠子應光廩生文行有名孫阿平食邑餼文章節氣見稱于時誥錫邑庠尙文雍正二年癸卯

舉人

據東莞志金通志勝朝殉節諸臣錄修

王應華字崇闇石岡人崇正元年戊辰進士除武學教授遷工部主事歷禮部員外郎中升甯紹副使招撫海寇數千人視學浙省剔釐弊陋不事請託論文務抒寫性靈空所依傍

一時名宿悉出其門晉福建按察使遭鼎革隱居水南結溪

南社以文酒自晦焉據張府志修

張家玉字元子號芷園萬家租人崇正九年丙子鄉薦十六年進士改庶吉士李自成陷京師被執上書自成請旌已門為翰林院庶吉士張先生之廬而褒恤范景文周鳳翔等隆禮劉宗周黃道周尊養史可程魏學濂自稱殷人從周願學孔子稱自成大順皇帝自成怒召之入長揖不跪縛午門外三日復脅之降牒以極刑卒不動自成曰當磔汝父母乃跪時其父母在嶺南家玉自屈人咸笑之賊敗南歸阮大鍼等攻家玉薦宗周道周于賊令收人望集羣黨家玉遂被逮明年南都失守脫歸從唐王入福建擢翰林侍講監鄭彩軍出杉關謀復江西解撫州之圍順治三年風聞大兵至彩奔入

關家玉走新城大兵來攻出戰中矢墮馬折臂走入關令以右僉都御史巡撫廣信廣信已失請募兵惠潮說降山賊數萬將赴贛州會大兵克汀州乃歸東莞四年家玉與舉人韓如璜結鄉兵攻東莞城知縣鄭霖降乃籍前尙書李覺斯等貲以犒士甫三日大兵至家玉敗走奉表永明王進兵部尙書無何大兵來擊如璜戰死家玉走西鄉祖母陳母黎妹石寶俱赴水死妻彭被執不屈死之鄉人殲焉西鄉大豪陳文豹奉家玉取新安襲東莞戰赤岡未幾大兵至攻數日家玉敗走鐵岡文豹等皆死覺斯怨家玉甚發其先壘毀及家廟盡滅家玉族村市為墟家玉過故里號哭而去道得衆數千取龍門博羅連平長甯遂攻惠州克歸善還屯博羅大兵來攻家玉走龍門復募兵萬餘人家玉好擊劍任俠多與草澤

豪士游故所至歸附乃分其眾為龍虎犀象四營攻據增城十月大兵步騎萬餘來擊家玉三分其兵犄角相救倚深谿高崖自固大戰十月力竭而敗被圍數重諸將請潰圍出家玉嘆曰矢盡礮裂欲戰無具為用徘徊不決哉因徧拜諸將自投野塘中死年三十二明年永明王贈家玉少保武英殿大學士吏部尚書增城侯諡文烈其父兆龍猶在以子爵封之著有名山集軍中草大易纂義詞林館課燕山吟西征集

歷代帝王說名臣論贊百將妙畧等書

據明史本傳 東莞志修

蘇觀生字宇霖年三十始為諸生崇正中由保舉授無極知縣以總督范志完薦進永平同知監紀軍事尋遷戶部員外郎十七年京師陷脫走南京進郎中催餉蘇州明年五月南京破走杭州會唐王聿鍵至觀生謁王王與語大悅聯舟入

福建與鄭芝龍鴻逵兄弟擁立王擢為翰林學士旋進禮部右侍郎兼學士設儲賢館分十二科招四方士令觀生領之超拜東閣大學士參機務觀生數贊王出師見鄭氏不足有為事權悉為所握請王赴贛州經畧江西湖廣王乃議觀生先行明年觀生赴贛州大徵甲兵餉不繼竟不能出師順治三年三月大兵破吉安總督萬元吉乞援觀生遣二百人往元吉令協守綿津灘遇大兵潰走元吉退回贛州大兵遂圍城觀生走南康贛人數告急不敢援六月大兵退屯水西觀生發三千人助贛守久之他將戰敗九月大兵再攻贛州三千人皆引去時觀生移駐南安閩中急不能救聿鍵死于汀州贛州亦破觀生退入廣州監紀主事陳邦彥勸觀生疾趨惠潮扼漳泉可自保不從會丁魁楚等議立永明王觀生欲

與共事魁楚素輕觀生拒不與議呂大器亦叱辱之適唐王弟聿鏘與大學士何吾騶自閩至南海關捷先番禺梁朝鐘首倡兄終弟及議觀生遂與吾騶及布政使顧元鏡侍郎王應華曾道唯等以十一月二日擁立王就都司署爲行宮卽日封觀生建明伯掌兵部事進吾騶等秩擢捷先吏部尙書旋與元鏡應華道唯並拜東閣大學士分掌諸部時倉卒舉事治宮室服御鹵簿通國奔走夜中如晝不旬日除官數千冠服皆假之優伶永明王監國肇慶遣給事中彭耀主事陳嘉謨齋敕往諭耀陳倫序語甚切因詆觀生諸人觀生怒執殺之乃治兵日相攻以番禺人陳際泰督師與永明王總督林佳鼎戰于三水兵敗復招海盜數萬人遣大將林察將十二月二日戰海口斬佳鼎觀生意得務粉飾爲太平事而委

任捷先及朝鐘捷先由進士厯官監司小有才便筆札朝鐘舉于鄉善談論浹旬三遷至祭酒有楊明競者潮州人好爲大言詭稱精兵滿惠潮間可十萬特授惠潮巡撫朝鐘語人內有捷先外有明競強敵不足平矣觀生亦器此三人事必咨之又有梁濞者妄人也觀生才之用爲吏科都給事中與明競大納賄賂日薦用數十人觀生本乏猷畧兼總內外任益昏瞶招海盜資捍禦其衆白日殺人縣肺腸于貴官之門以示威城內外大擾時大兵已下惠潮長吏皆降附卽用其印移牒廣州報無警觀生信之是月十五日聿鏘視學百僚咸集或報大兵已逼觀生斥之曰潮州昨尙有報安得遽至此妄言惑衆斬之如是者三大兵已自東門入觀生始召兵搏戰兵精者皆西出倉卒不能集觀生走濞所問計曰死爾

復何言觀生入東房鑿入西房各拒戶自縊觀生慮其詐稍留聽之蓋故扼其吭氣湧有聲且推几仆地久之寂然觀生信爲死遂自經明日蓋獻其屍出降聿鏘方事閱射急易服踰垣匿王應華家俄縋城走爲追騎所獲饋之食不受曰我若飲汝一勺水何以見先人地下投繯而絕吾騶應華等悉降

據明史本傳修

謹案番禺志載君臣塚在廣州大北門外流花橋紹武僞帝聿鏘及蘇觀生槩葬處也羅天尺有詩云流花橋北蔽蒿萊孰向荒原酌酒杯一死未慙浮緬日九原休羨霸齊才鍾山空有遺民恨宮樹誰爲內監哀不道白雲兵燹後孤墳猶得傍朝臺

林洵字習修大父御史培洵稍長讀其書慕效之天性孝友

弱冠補諸生父沒有遺腹弟與其子同時病中風急洵謂醫幸先吾弟吾父不可作也且泣思文立以人才徵不行卽授推官監武興營軍亦不拜聞粵并失乃曰姑以一命見先人地下遂起就職侍郎張家玉洵門弟子也方起義時家玉念父老未有所處每過洵舍短衣扼腕繞書幌行數十百匝抵夜輒去竟三日不出一語一夕雞未鳴篝燈呼洵門洵卧未起遽入從牀外遙謂曰先生吾計決矣洵立命三子楊杞培衣冠出中庭列高燭坐家玉而拜之曰子真兒曹師也家玉敗東官引兵趨新安洵徘徊里中義師旣屢敗于是爲文謝世爲息者所發時有僧往來家玉行間捕之得洵書白縣令令籍其家送廣州在獄著讀易三十四則臨刑有詩曰願續當年李侍郎遺言謝世報高皇獨憐一片忠貞骨不死沙場

死法場年四十七弟泗美亦誅死

據東莞志修

李如月官御史由榔駐安龍時孫可望盤踞貴州桂王在廣西時請奉朔歸附要桂王封已為秦王獲叛將陳邦傅父子去其皮傅屍至安龍如月劾可望不請旨擅殺勛鎮罪同莽操而請加邦傅惡諡以懲不忠王知可望必怒留其疏召如月入諭以諡本褒忠無惡諡理小臣妄言亂制杖四十除名意將解可望而可望大怒遣人至王所執如月至朝門外抑使跪如月向關叩頭大呼太祖高皇帝極口大罵其人遂剔其皮斷手足及首實草皮內紉之懸于通衢

國朝賜諡烈愍

據明史吳貞毓傳勝朝殉節諸臣錄修

安宏猷字叔壯其先靈璧人以祖圯功世襲南海衛指揮遂家焉宏猷慷慨有志畧喜談忠孝大節甲申聞京師陷北嚮

勸哭順治三年大兵下廣州欲嬰城以待肇慶兵為知縣余經國所阻明年三月遂結鄉兵攻城據之甫五日而大兵至宏猷從容入室訣其妻曰我世臣國存與存國亡與亡分也今出戰眾皆烏合勢必不支爾能共我殉義乎妻曰諾宏猷乃出南門而陣三合皆敗堪腹椿喉死妻聞之曰婦從夫者也且我世婦夫命之矣亦率女與幼男皆死宏猷弟宏勳子正邦正道皆受誅安氏殲焉

據東莞志修

張家珍字璩子增城侯家玉仲弟家玉起兵時珍年十七常著小金冠披紫鎧別率所部千人為奇兵轉鬪數勝家玉沒以兄蔭拜錦衣使廣州再破家居奉養始折節讀書通賓游所居室不三畝而客常數十人自高僧羈人劍士技術無不披肝膽寫意氣人竭其歡心援筆為詩歌畫蘭竹皆伉爽有

致年及三十而卒

據獨漉子集修
以上東莞

南海李徵爵分纂

南海梁起初校

番禺金佑基再校

番禺史悠泰三校

順德羅槩四校

廣州府志卷一百二十四終



